

佛說海龍王經彙編

財團
法人 佛陀教育基金會印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意亵瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

——恭錄自《印光大師文鈔三編卷四：靈巖山寺念佛規題辭》

佛說海龍王經彙編總目錄

佛說海龍王經
佛爲婆伽羅龍王所說大乘經
龍王兄弟經
佛爲海龍王說法印經
俱力迦羅龍王儀軌
說矩里迦 <small>唐作 草劔</small> 龍王像法
佛說俱利伽羅大龍勝外道伏陀羅尼經
十善業道經
大方等大集經卷第四十四
日藏分中三歸濟龍品第十二

181

171

169

165

159

157

153

137

1

佛說海龍王經

佛說海龍王經目錄

卷第一

行品第一

分別品第二

一八〇

六度品第三

二二〇

無盡藏品第四

二四〇

卷第二

總持品第五

三四〇

總持身品第六

三四〇

總持門品第七

四五〇

分別名品第八

四五〇

授決品第九

五六〇

請佛品第十

六八〇

卷第三

十德六度品第十一

七六〇

燕居阿須倫受決品第十二

八六〇

卷第四

無焚龍王受決品第十三	九〇
女寶錦受決品第十四	九三
天帝釋品第十五	〇〇
金翅鳥品第十六	二
舍利品第十七	一
法供養品第十八	一〇〇
空淨品第十九	一〇九
囑累受持品第二十	一二七

佛說海龍王經卷第一

行品第一

西晉月氏國三藏竺法護譯

聞如是。一時佛遊王舍城靈鷲山。與大比丘衆俱。比丘八千。菩薩萬二千。一切大聖十方來會。衆德具足。得諸總持。無所不博辯才至真。決一切疑。入大神通。分割慧義。諸度無極。濟於彼岸。究竟暢開士定意。正受諸佛咨嗟。普遊殊域。神足飛行。降化衆魔。分別諸法。知如本諦。覩見一切衆生之原。積累道品於世八法而無所著。以大慈哀嚴身口意。彼無極鎧過大精進。於無數劫而不厭倦。爲師子吼。開化外道。以不退轉印如印之。曉了諸佛深要法藏。其名曰。

山光菩薩。惠山菩薩。大明菩薩。總持山剛菩薩。山鎧王菩薩。山頂菩薩。山幢菩薩。山王菩薩。石磨王菩薩。雷音菩薩。雨王菩薩。寶雨菩薩。寶英菩薩。寶首菩薩。寶藏菩薩。寶明菩薩。寶幢菩薩。寶頂菩薩。寶印手菩薩。寶暢菩薩。寶嚴菩薩。寶水菩薩。寶光菩薩。寶鎧菩薩。寶現菩薩。寶造菩薩。樂嚴法菩薩。淨王菩薩。嚴頂相菩薩。金光飾菩薩。寶髻菩薩。天冠菩薩。千光菩薩。原嶮菩薩。照昧菩薩。月辯菩薩。發意轉法輪菩薩。金光淨菩薩。常施無畏菩薩。萬二千菩薩。德皆如是。是賢劫中大士彌勒軟首等六十大聖不可思議解縛等十六正士。帝釋四天王與忉利天人俱。焰天。兜術天。不惱樂天。化自在天魔子道師。梵天王。梵淨天王。善梵天王。梵具足天王。大神妙天。淨居天。離垢光天。乃至一善天。燕居。無善神王。各與眷屬。

六萬山樹神王四萬二千力士神王一名持華三萬二千與香音
神俱無焚龍王與七萬二千諸龍俱四方金翅鳥王及餘一切諸
大尊神天龍鬼神無善神鳳凰神王山樹神王甜柔神等各與眷
屬來詣佛所稽首畢一面住比丘比丘尼清信士清信女前爲佛
作禮各坐一面彼時佛與若干百千之衆營從圍遶佛處諸天嚴
淨師子高廣之座爲四部衆而普說法佛在衆中如安明山王現
于大海德超諸天世無雙比光明巍巍靡所不照如來威變應時
空中化有寶蓋衆珍雜瑣遍覆四方無數百千垂珠瓔珞青黃赤
白無垢寶珠照虛空之中出大雷音雨衆名香於是賢者大目犍連承
佛聖旨前問佛言今所感動未曾見聞此何瑞應佛告目連今海

龍王欲來見佛故先現瑞。佛語未竟尋時龍王與七十二億婬女八十四億眷屬皆賚香華幢幡寶蓋百千伎樂往詣佛所前稽首畢遶佛七匝各以所持用散佛上伎樂供養與中宮眷屬俱住佛前以偈讚曰

慈施愍傷俗	示現與世眼	雖生於世俗	無著如蓮華
施俗之安隱	在世照三世	解法如日光	稽首世最上
十力超施戒	自調成眷屬	燒除塵勞冥	御衆如調馬
施與七大財	恩慈加衆生	爲一切父母	稽首最福田
眉間相光曜	如日白雪光	梵天人在上	無能見其頂
佛面出大光	蒙光獲安隱	普照百千國	至于無擇獄
柔軟言無極	解決衆疑結	音遍天世間	清淨無垢穢

除姪怒癡冥 照以智慧光 施安令歡喜 爲示現解脫
無礙達三世 求比無等倫 知人群萌行 了善惡所趣
觀察人根原 一時咸能覩 閣心令解脫 稽首諸慧上
百千億諸魔 詣樹求佛便 至德願威神 降化伏邪心
不瞋不厭惓 導以慈哀力 供養世之尊 孰敢懈慢者
觀法無所有 譬之如虛空 猶電霧泡沫 幻化及野馬
本空緣相與 計之無吾我 照示生死法 是故莫不供
所以無數劫 勤行億那術 不可計諸佛 稽首大聖雄
布施及戒忍 精進禪智慧 尊願已具足
於是海龍王 說此偈讚佛已 前白佛言 諸欲有所問 儻肯聽者乃
敢宣陳 佛言 在汝所問 若有疑者 如來當爲具發遣之 龍王見聽

喜踊問曰。何謂菩薩除諸惡趣。何謂菩薩超出諸難。何謂菩薩生天上人間。何謂菩薩不離諸佛。何謂菩薩得值善友。何謂菩薩常在安隱。何謂菩薩常懷篤信。何謂菩薩多所悅護。何謂菩薩濟衆因緣。何謂菩薩長益善法。何謂菩薩喜造德本。何謂菩薩常樂於義。何謂菩薩不著五陰。何謂菩薩常好於法。何謂菩薩樂於法樂。何謂菩薩所聞無厭。何謂菩薩請益觀義。何謂菩薩聞能奉行。何謂菩薩具出家德。何謂菩薩離居順戒。何謂菩薩棄於重擔。何謂菩薩常處樹下。何謂菩薩樂處閑居。何謂菩薩而獨燕處。何謂菩薩離諸諛諂。何謂菩薩具出家慧。何謂菩薩入深要法。何謂菩薩觀法如幻。何謂菩薩不墮滅見。何謂菩薩不墮常見。何謂菩薩超因緣法。何謂菩薩離諸邪見。何謂菩薩神通自樂。何謂菩薩而得

六通。何謂菩薩而得慧通。何謂菩薩漏盡神道。何謂菩薩現無蓋慈。何謂菩薩所見無礙。何謂菩薩曉了衆生心之所行。何謂菩薩行無厭足。何謂菩薩分別所受教化之言。何謂菩薩降伏魔怨。何謂菩薩離諸恐懼。何謂菩薩御退轉者。何謂菩薩得不退轉。何謂菩薩逮不起忍。何謂菩薩過於諸淨。何謂菩薩諸行清淨。何謂菩薩世尊授決。佛言善哉善哉。海龍王乃問如來如此之義。諦聽諦聽善思念之。龍王曰。唯然世尊。願樂欲聞。佛言。菩薩有四事棄諸惡趣。何等爲四。菩薩無害心於衆生。常護十德。不說人短。亦不輕慢。自省己過。不訟彼穢。是爲四。復有四事超出諸難。何等爲四。常歎三寶佛法聖衆。有樂法者而不燒亂。不造人疑。有猶豫者悉開導之。是爲四。復有四事生天上人間。何等四。不捨道心。又教他人。

亦不毀戒。心願清淨爲人說經而發大哀。是爲四事。復有八事。不離諸佛。何等八。常念諸佛。供養如來。嗟歎世尊。作佛像形。勸化衆生。使見如來。其所向方。聞佛之名。願生彼國。志不怯弱。常樂微妙佛之正慧。是爲八事。復有四事。得值善友。何謂四。不慢無諂。常加恭敬。柔和順言而不自大。常受言教。是爲四。復有三事。常在隱處。何等三。不剛不鉤而不諛詔。除諸貪嫉。見人得供代其歡喜。是爲三。復有五事。常懷篤信。何等五。曉樂脫力。積功德力。入報應力。道心力。將御法力。是爲五。復有二事。多所悅護。何等二。不捨歡喜。不在瞋恨。是爲二。復有二十事。護衆因緣。何等二十。常信佛教。不著他緣。所作自護。他作他受。法法相應。法法相照。善惡報應。無亂不順。心無想念。無我無人都無所有。亦無往來。無所歸趣。除因緣。

報由罪福安危將護諸緣諸佛世尊皆由清淨而成道德除衆惡事以故吾等修行善本是爲二十復有二事長益善法何等二知於三品行無放逸是爲二復有二事何等二喜造德本亦不想報是爲二復有五事常樂於義何等五不著色聲香味識是爲五復有五事常好於法何等爲五不貪色痛志得智慧擁護一切是爲五復有六事常樂於法何等六樂於五根不樂五欲常樂法會不樂世談樂講說經不樂衣食常樂觀法不樂不淨樂遵修法不樂文字樂於佛法不樂聲聞緣覺法是爲六復有八事樂於法樂何等八樂講佛道不樂卑賤樂度無極不樂聲聞緣覺道樂讚四恩不樂非法樂大慈哀不樂世事樂說大道不樂終始樂講深法緣起之本不樂常無常我人壽命樂空無想無願真諦之法不樂調

戲離放逸想樂嚴佛國不樂觀滅是爲八復有五事所聞無厭何等五博聞智慧利於明達聞無厭足普聽不懈決諸狐疑聞無厭足因聞覺了塵勞恚恨故無厭足因聞斷欲而除一切衆生垢著故無厭足因聞勇猛決一切疑故無厭足是爲五復有二事觀義求聞不倦何等二興於賢聖正見之行得無礙辯總持之要是爲二復有十事聞能奉行何等十利知厭足在於閑居身口心寂進止安詳所聞觀淨獨處少事不樂衆鬧初夜後夜常觀精進敬重善友志懷羞耻常以大哀護於一切等賢聖禪至德具足以慧救護天上世尊是爲十復有五事具出家德何等五所作已成不復忘失滅除塵結其心當捨一切諸著諸佛世尊不訟其短已得解脫見諸縛者爲說脫法是爲五復有五出家順戒何等五救順禁

法救濟毀戒。順諸所聞救濟妙聞。順所定意救濟亂心。順所智慧救濟惡智。順所度知立於衆人安隱無爲。是爲五復有五棄。何等五棄於重擔而除五陰。斷恩愛結及諸所習。常以寂定捨於寂滅。入于道德奉行八道。入於聖諦立一切人於正諦法。是爲五復有四法常處樹下。何等四不惜身命。奉行一切諸德善法。發神通慧。行寂然事天人欣悅。是爲四復有四事樂處閑居。何等四發大哀以處閑居。諸佛所歎欲救衆生。無偏邪行坐成佛時莊嚴自由。不爲塵勞學餘菩薩究竟之行積閑居德。入於郡國縣邑聚落爲衆說法。是爲四復有三事而習燕坐。最尊無上功德微妙爲賢聖行。何等三不習憎愛亦無所慕。自在離欲心無縛著。行步自由等心。一切疾得定意。是爲三復有三事離諸誤詔。其心質直而無恚恨。

已住於行衆結便斷是爲三復有八事具出家德何等八賢聖知足在於獨處得知限節逮諸博聞棄恨忍辱不捨道心行四意止專精定意而應智慧一切所興以行爲要是爲八復有十事入深要法何等十見身自然諸法自然身入於淨一切法淨見已無吾諸法無我自觀身空不疑諸法空己身無聲諸法如響察身寂寞諸法靜默我者審諦觀諸法諦我志深妙見諸法奧己身無聞諸法如聲吾無所受見一切法無可取者是爲十復有十事諸法如幻興詭詐相諸法如夢所見無實諸法如野馬起顛倒想見不諦故諸法如影所作因緣無以爲樂諸法如水月捉不可得其相離行諸法如響本末悉空諸法如電晃現隨滅諸法如畫離婬怒癡諸法本淨不爲客垢之所沾汙諸法如虛空適起尋滅無有處所

是爲十。復有二事不墮滅見。何等爲二。隨時之慧入於罪福了別諸佛聖智之明。是爲二。復有二事不墮常見。何等爲二。一切說無常慧。適起便滅。意無永存。是爲二。復有四事超因緣法。何等爲四。無黠之習入生死習。無黠已滅。生死便除。不墮滅見不住常觀。是爲四。復有四事離諸邪見。何等四。曉空慧。不見彼我。解無相。不見壽命。了無願。不見三處。分別緣起離常無常。是爲四。復有六事。以諸神通而自娛樂。何等六。不以惡眼視於衆生。得天眼淨。聞惡聲音。則能忍辱。逮天耳淨。其心不亂。覩他心淨。殖衆德本。則識過事。如口所語。身行亦爾。獲神足淨。修行諸敬。不欺法師。盡諸漏淨。是爲六。復於六事得六通。何等六。以然燈故。得天眼淨。施諸音樂。得天耳淨。施無慾。望了衆生心。殖衆德本。知過去事。却諸陰蓋。決衆

狐疑逮神足淨。以法布施盡諸漏淨是爲六。復有六事而得通慧。何等六。適見如來得天眼淨。合會說法得天耳淨。制伏其心見衆生意。常習六念得識宿命。棄諸貪濁逮成神足輕舉能飛。遵修諸法得盡諸漏。是爲六。佛復告龍王。以有神通而自娛樂。聲聞緣覺及外道神仙。天龍鬼神無善神。鳳凰神王山神王。甜柔神人與非人。所有天眼。計菩薩眼最上無極清淨明徹。除如來眼。菩薩之眼無所不見。天人光色諸法之本無所罣礙。又聲聞緣覺及天龍神人與非人。計菩薩耳最上無極清淨明徹。除如來耳。菩薩之耳無所不聞。天人音聲諸法之講無所罣礙。聞諸音聲知三達事。皆了一切衆生之心。所行造念因緣報應往來之想。淨不淨著不著。若干種心。若逆心。若順心。縛心解心。依心不依心。惑心定心。有處心。

無處心若興衰心已曉了之悉見人根如應說法以識宿命知彼我本終始所起無所不達至誠不虛神足無猗無所不現是爲菩薩五神通又心自在所作具足是爲娛樂示現佛身而般泥洹不永滅度何謂菩薩漏盡神通菩薩超越聲聞緣覺所得解脫猗於佛慧曉了衆生一切本淨不盡諸漏而不取證爲一切人讚諸漏盡是爲六神通復有四事見無蓋慧何等四遵修慧德致此五通行大慈大哀知四解行奉善權慧逮四無礙定意正受空無相無願致三十七道品之法是爲四佛復告龍王何謂所見無蓋諸有塵勞除一切垢所有罣礙現生死本導御泥洹現聲聞緣覺乘化至道場隨勸習俗示人行寂是謂無蓋復有無蓋現一切數至無所有現滅諸數逮無所著雖在有數諸行之事於無數法無所罣

礙。彼無陰蓋得至無爲。於有爲法亦無羈礙。是謂菩薩現無礙慧。復有四事。曉了衆生心之所行。隨習俗慧正受明了。識意所爲。善權方便。於諸法自在。是爲四。復有五事行無厭足。何等爲五。已獲大安令衆生安。大哀堅強。視一切人如己骨髓。隨人所行而示現。行立於極上奇特之德。是爲五。復有六事分別所受教化之言。何等六。逮得總持心立寂然。入審諦淨心入諸慧。辯才無著無止。方便之慧次第解脫。是爲六。復有八事降伏魔怨。何等八。曉了五陰譬若如幻。離貪見塵而行空事。知一切法皆無所生。隨其所生。如開導之。不捨道意堅強精進。不捨佛道。不畏三界。離於所有觀於人物。求審諦慧。觀無常相。積德不厭合集智慧。不樂聲聞緣覺之智。是爲八。復有十事離諸恐懼行菩薩事。何等十。行於布施以莊

嚴想立于禁戒斷諸惡趣遊於忍辱諸根不亂堅強精進種善不
惓修行禪定其心不慌成于智慧而離塵勞善權方便曉了無邊
聖智之願得分別事解知法義辯才隨順逮得總持決除衆生諸
所狐疑得住佛住護一切法是爲十復有八事御退轉者何等八
言行相應自省已過不說彼闕寧失身命不造輕重獲利不喜無
利不惑心不懷害誘導一切興衆祐意等敷禁戒不捨師法安悅
衆人不自求安一切所愛施而不悔是爲八復有五事得不退轉
於無上正真道何等五善權方便成諸度無疑入深妙法了審諦
義神通無礙見衆生根分別諸慧行無所著行不可盡遊於緣起
不盡一切諸漏之證是爲五復有三事逮不起忍何等三察人清
淨而無吾我法淨寂寢慧淨無著是爲三復有三事過諸清淨過

去清淨諸法常盡。當來清淨法無所起。今現清淨法無所住。是爲三。復有三事。身行清淨功德熾盛。口言清淨智慧巍巍。意念清淨定而不轉。是爲三。復有四事。爲佛世尊所見授決。何等四。情性和順奉遵于法。具足諸行觀清白行。逮得慧力解一切心。了諸法本淨不起不滅所由不亂。佛告龍王。是爲四法菩薩所行。爲佛世尊所見授決。

分別品第二

佛說是已。十二億百千諸天龍神香音神人與非人。皆發無上正真道意。七萬二千菩薩得不起法忍。百四十萬衆得法眼淨遠塵

離垢八千比丘漏盡意解。五千天子得離愛欲。三千大千世界六
返震動。其大光明普照世界。空中自然而雨天華。諸天在上鼓百
千伎樂。共歎頌曰。今者如來所說經法爲再轉法輪。在波羅奈所
轉法輪。今說斯經復加增倍。所以者何。於此經者爲無央數不可
計人開導利義。若人聞此德本不忘。何況受持能奉行者。善得人
身快見。如來諦聞此法。聞此法已便發無上正真道者。閉塞惡趣。
開天人迹。當觀此比如獲滅度。於是世尊讚諸天子曰。善哉善哉。
快說此言。聞斯經法歡喜信者。佛所建立開化大乘。是等之類逮
如來慧。不退轉印而以印之。終不餘趣順至佛道超諸苦難。於是
龍王聞說斯經。欣然喜踊。善心生焉。有摩尼珠名曰立海清淨寶
嚴普明。價直三千大千世界。以奉世尊。其珠之光覆蔽日月之明。

一切衆會得未曾有。禮佛而住同音而歎。佛興難值既興於世。乃現若茲。未曾有法。時海龍王獻寶珠已。而白佛言。以是德本。逮得無礙佛身光明。令其光明普照十方諸佛國土。若人蒙光除諸塵勞。如今如來眉間光明。令我如是。觸却衆冥。逮平等覺。其入邪者。令立正道。

六度品第三

海龍王白佛。何謂菩薩。觸却衆冥。佛語龍王。菩薩智慧殊異。手執慧燈。分明智慧。智慧最勝。持智慧劍。有所興造。皆以智慧建立智

慧而以布施持戒忍辱精進禪思智慧建立智慧修行於戒忍辱
精進一心普觀諸法建立智慧開化衆生菩薩何謂建立智慧而
行布施等於布施布施已等等於吾我吾我已等便等於人已等
於人諸法得等諸法已等得諸佛等雖有所施不捨是等既所施
者不隨塵勞而以施時捨一切塵亦復如是捨一切生則一切施
離諸住見棄諸所有是爲菩薩建立智慧而以施彼何謂菩薩建
立智慧而奉禁戒見身意寂斯護禁戒不倚身口意不倚今世後
世亦無内外不倚陰蓋四大諸入不倚覺意不倚滅度於一切法
亦無所倚則爲護戒不以戒戲亦不放逸是爲菩薩建立慧戒彼
行忍辱亦不得我亦不得人亦不得我人不住吾所不住我所我
淨人淨我淨人淨見一切法淨是爲行忍彼雖行忍於法無作於

法不起不滅。彼雖行忍。於諸法無寂不寂。彼雖行忍。見人空寂而無吾我。亦不恐怖。彼雖行忍。亦不得身口意。彼雖壞身段節解之。自觀其身如草木牆壁。則爲忍辱。彼聞惡言罵詈自在言。不可取言。清淨言無處所。曉了所言。則爲忍辱。彼雖亂心心無所結。本無之心。各各無實須臾滅盡。以觀如此。則爲忍辱。是爲菩薩建立慧忍。彼修精進長諸善法。觀其法界不增不減等御法界。察一切法不見諸法立成就者。觀猗世者。由從不實顛倒而興。彼以清淨智慧之明觀。一切法不隨諸法。不捨諸法。不覩諸法之所積聚。不見去來何所從來何所從去。曉了諸法。遵法如是分別苦諦顛倒之事。爲人說法修行精進。彼諸衆生無實無諦。若人無得。一切諸法亦不可得。所以者何。人不離法法不離人。如人自然吾我自然。吾

我自然諸法自然諸法自然佛法自然其以如是求諸佛法如自然者解自然已便逮佛法其有求者若已求者甫當求者彼求此已求無所得是爲菩薩建立智慧精進之行彼於禪定而以正受不壞平等亦不成就彼於禪定而以正受諸法無思亦無所捨亦不合會於諸境界行無著禪立諸禪法於諸法等亦無錯亂非身非心思惟禪定志性無所應行不以禪行等於本無而以正受於本淨法而致平等等一切人則致平等諸法本淨等無有色不以三昧所行如應心而不住內亦不起遊外識無所住度於一切墮顛倒者超外五通聲聞緣覺禪定正受彼以禪定出智慧上除塵勞見彼以禪定志願于道開化衆生是則如來常一禪定至于滅度是爲菩薩建立慧定彼觀諸法以慧眼察亦非肉眼亦不天眼

觀諸法已。見諸法寂。觀諸法默。諸法寂寘無行無處。諸法澹然無所成就。普觀諸法皆已如是。如是觀者是爲法觀。法觀如是不見諸法之所歸趣。其有見法而不觀者。不以見法而成觀也。無求無曉。不知不見。是爲見法。無我無人無壽無命。是爲見法。假使菩薩觀法如此。見人顛倒益於衆生。而發大哀。法淨如是衆人猗著。於是菩薩發弘大志。欲度群萌。是群萌者常無萌類。是爲菩薩建立慧法。

無盡藏品第四

佛告龍王。何謂菩薩建立智慧。爲人說法。不見有人。人者無我。無

人非身人者寂寘。人無所有。人者本淨。人者音聲。人者名耳。人空無相無願。人非有數。人而審諦。人無所生。人不有起。爲人說法。講人清淨不懷吾我。無壽無命。不滅自然。不滅所有。隨人本行而爲說法。何況衆生本淨自然。無我自然。無形自然。則人自然。設人自然。以此自然諸法自然。設諸法自然。一切佛法亦復自然是謂一切諸法悉爲佛法。一切諸法但假名耳。因號有名。設說諸法則講非法。所以者何。如法所言非法亦然。如呼法音則非法音。所以者何。諸法法界及與本淨不可言說。亦無所得。法界本淨亦無所持。一切法界諸法本淨。壞一切法何所成就。是爲諸佛法爲說經法。以是因緣寂寞如是。不有諸佛法聲之化識也。佛法無教而不可處。有爲無爲。所以者何。不離有爲無爲而以解脫。寧有異法可計。

數乎。龍王答曰。不也。世尊。諸法無數。如來無數。佛言。如是。如仁所言。諸法無數。如來無數。則無有二。於龍王意云何。無數之言。有處所乎。答曰。不也。世尊。佛言。何以故。當知當作斯觀。佛法無處。無言。如佛法無言無處。一切諸法無處無言亦復如是。龍王觀視。如來大哀巍巍。若茲開化衆生。令立堅固。又一切法無處無教。說因緣教。是法有漏。是法無漏。是有世。是度世事。有著無著。有數無數。有爲無爲。塵勞瞋恨。習是捨是。凡法聖法。學法不學法。聲聞法緣覺法。菩薩法。佛法。佛言。龍王。如來如是。爲人說法。講其處所。亦不見法。無諸法想。譬如有人虛空無色無見。欲以諸色畫於虛空。而作天像及諸人像。象馬步乘。彼人畫是寧難不乎。答曰。甚難甚難。至未曾有。天中之天。佛言。龍王。如來所爲甚難。於彼諸法無色。

無取而不可見亦無文字亦無所得而爲一切講說言教示現文字設以方便此乃甚難其有信入如是像法是等諸人多所成辦若有受此深妙義者不爲諸魔之所得便憶念我過世龍王更見供事無央數佛恒輒捨家淨修梵行彼如來等未曾爲吾說深妙法應病如講布施持戒學道之法聽聞忍辱仁和之教燕居靜處止足功德所以者何行德未了了行德已從大殊曜如來即得聞斯深妙之法應時逮成柔順法忍以是之故當知此義當作是觀聞是深法功德具足從過去正覺受此深經無想無名衆穢因緣無我無人無壽無命信樂受持諷誦爲他人說其福甚多若有菩薩愍傷一切欲令安隱使三千大千世界一一衆生皆得所安諸天人民合集此德施與一人於龍王意云何菩薩寧爲衆生加無

極安不乎。答曰。甚多甚多天中天。佛言。其有菩薩施諸衆生若干安隱。若爲人說一句無常苦空非身之義。空無相無願。無我無人無壽無命不生不起之事。則是施安福難稱量。所以者何。有爲之安衆生皆更無爲之安未曾歷也。彼其以此深妙之法而暢音聲。於無爲安以爲服食。是故菩薩欲自立義具世人願。當學深妙之法。若有菩薩所在會坐。捨深妙法說雜句飾。則爲斷絕正法之化。所以者何。是深妙法布闍浮利而不沒盡。人所聽受。樂於法者不足言耳。非人最多。假使法師藏深妙法。讀雜句者不樂深法。天則不歡悅。是族姓子隨世所樂而說俗事。嗚呼痛哉。此衆會中無說法者。心懷悽感而退捨去。時海龍王白世尊曰。布施持戒學道之法是俗事耶。棄家出學淨修梵行非佛法耶。世尊答曰。諸佛興已

起無起法。於三界行有所救護。皆是俗事。非是佛語。彼則何謂四禪。四等心。四無色定。五通十善之行。布施持戒。忍辱精進。一心智慧。書疏校計。經卷體醫方藥巧工技術。身想衣食財物。所愛禪定。在三界行。皆是俗事。非爲佛言。佛告龍王。佛興於世間。未曾所聞。非常之苦。非我之寂。除於苦義。斷乎習義。證於盡義。遵修道義。入乎空義。度於無想。導御無願。於諸衆行。不生不起。義意止意。斷根力神。足覺意觀。八寂路。求真諦本淨。如無所起。陰種諸入。爲空寂義。所白諸義。不壞諸法。不壞非法。解一切法。不生不長。皆無所起。不計有常無常。由因緣起得。無所生。還於本淨而離色欲。現無數法。入於道法。在於道法。無想不想。無應不應。捨於一切念淨。不淨想。無舉無下。陰幽冥門。自然如空。得平等行。於想等想。無想。於想

離想均於一想離一切想無所觀見寂然諸所見現諸顛倒一切平等謂得果跡皆音聲耳彼無所得亦無不得不受不捨佛語龍王是所先說諸法之御所得不可稱說至於聲聞獲聲聞乘至於緣覺獲緣覺乘菩薩逮得不起法忍成於如來無上正真道爲最正覺斯謂佛言是所言者隨習俗教皆是佛教於真諦佛道無文佛言無言佛教無跡佛教無想佛教無歎佛教無化佛教無正佛教無名佛教無思佛無心意識亦無所念是謂佛教而不可說亦無言教不可指現佛語龍王如是比教乃爲佛言如來不以文義說法無文字教而爲說法是故無文則爲佛教佛所說法不有所逮滅一切得佛所說法是故無得爲佛所言佛所說經曾無言教寂滅言教以故言曰無教佛言說法無取法無猗法無放逸法

不想法無起法無壞法無究竟法無所得法無所志法無所念法無所行法無分別法無有想法無所至法無所推法佛語龍王如來爲人說法未曾有行有所證也吾之所言一切本淨法無形色是故龍王諸法無像是名佛言又復何謂号爲佛言解一切音無所不達故曰佛言察去來今無所罣礙故曰佛言覺了衆言故曰佛言報答諸問故曰佛言一切所說因緣有言無所不博故曰佛言覺諸所說如呼聲響故曰佛言無字無說故曰佛言諸所字說亦皆佛言所以者何是諸文字去來今佛所說今佛所說者已說之者當來說者以是之故一切文字諸所言教皆名佛言入如此比曉了衆慧是謂菩薩分別道義故曰文字言說皆号佛言不壞法界志一味慧是謂菩薩分別經本故曰文字言說皆号佛言其

有如應順于法慧。是謂菩薩分別順寂。故曰文字言說皆号佛言。其有說慧無處無著。是謂菩薩分別曉了。是故龍王。一切諸法莫不歸此。分別四義。菩薩解四義者。文字言說諸所歸趣。身有所在。莫不誘進。皆入佛教。是故無著本無所住。於百千劫有所言說。無能制者。所以者何。是名曰無盡之藏。總持門也。假使菩薩逮斯持者。說無盡句。善順於教。棄去來瑕。如應無猗莊嚴。百千真妙之句。忍於本淨。將護不亂。尊卑之義。曉了平等。光曜所有。塵勞瞋恚。入一切行而順解脫。八萬四千諸根尋如所應。善講本性而爲說法。不盡八難音聲諸法。亦無有盡。及譬喻慧三世無盡。及報應果願可盡耶。經典順普可盡耶。心之所入可盡耶。因緣愚跡可盡耶。順在愛欲可盡耶。發于斯持可盡耶。說乘所處可盡耶。分別法處可

盡耶。深妙雜句可盡耶。至於究竟可盡耶。逆順之言可盡耶。名字之訓可盡耶。歎佛法衆可盡耶。說正諦可盡耶。佛道法品可盡耶。罪福所應可盡耶。講度無極可盡耶。佛語龍王是名曰所說無盡故。号無盡法藏爲總持門也。

佛說海龍王經卷第一

佛說海龍王經卷第二

西晉月氏三藏竺法護譯

總持品第五

佛告龍王。有四事法無盡之教。無盡之藏爲總持也。何等四。分別無盡。慧無盡。明智無盡。總持辯才無盡。是爲四。復有四事難攝。無盡之藏爲總持也。何等四。其性難攝。道心難攝。入法難攝。入衆生行難攝。是爲四。復有四堅固要。無盡之藏爲總持也。何等四。所願堅固。奉行堅固。立忍堅固。度於因緣所造堅固。是爲四。復有四所說。無盡之藏爲總持也。何等四。講諸至誠。講諸緣起。講衆生行。講諸乘本無慧。是爲四。復有四光無盡之藏爲總持也。何等四。照于

法界。照于智慧。照于慧明。照于如應之所說法。是爲四。復有四。上曜無盡之藏爲總持也。何等四。精進爲上。禁戒修行勤力爲上。求積功德爲上。合聚求慧爲上。是爲四。復有四。無窮無盡之藏爲總持也。何等四。求諸度無極而無窮極。不厭生死而無窮極。開化度人而無窮極。求諸通慧而無窮極。是爲四。復有四。無厭無盡之藏爲總持也。何等四。佛前聽經而無厭足。爲人說經而無厭足。求諸德本而無厭足。供養如來而無厭足。是爲四。復有四。無能勝者無盡之藏爲總持也。何等四。一切塵勞亦無能勝。一切諸魔亦不能勝。諸外異道亦不能勝。一切怨敵亦不能勝。是爲四。復有四。無習無盡之藏爲總持也。何等四。不習聲聞緣覺之乘。不習一切供養之利。不習一切諸所著求。不習一切諸凡夫行。是爲四。復有四。無

得無盡之藏爲總持也。何等四。不得所生。不得開化惡戒之人。不得說經在於有爲爲上大乘。不得乞求。是爲四。復有四力無盡之藏爲總持。何等四。忍力忍於一切所作。衆惡慧力蠲除一切衆生疑結。神通力見一切衆生心之所念。善權力爲一切人如應說法。是爲四。復有四大藏無盡之藏爲總持。何等四。不自侵欺而斷三寶。是則大藏。入於無量之法。是則大藏。得一切心隨其所志。是則大藏。慧等如空。是則大藏。是爲四。復有四無極無盡之藏爲總持。何等四。博聞無極。智慧無極。所願無極。順衆生說法無極。是爲四。菩薩復有四事。不自侵至無盡之藏爲總持。何等四。說法不自侵。說至誠不自侵。順法行不自侵。得至道極不自侵。是謂四。復有四事。得無所畏。無盡之藏爲總持。何等四。不畏惡趣。不畏衆會。不畏。

決疑。不畏失佛道。是爲四無盡之藏爲總持也。佛告龍王。是無盡藏總持說德無量。入無極慧集菩薩行。所可由慧。光曜莊嚴菩薩所求。菩薩財寶所入法藏。入總持門分別言教。嚴身口意得淨諸國。合集自在護念正道。入衆生數慧化導。正法力精進具諸度無極。嚴淨道場逮諸佛法。是謂無盡之藏總持。其有文名字號之數及法諸數。遊于正法。皆來歸斯無盡之藏爲總持也。菩薩入斯於諸文字無所分別。諸法清白不壞本淨故。樂一切法不侵樂法故。究竟諸法所志。諸法亦無侵欺故。一切眼法不侵諸法明故。諸法假号不侵會法故。以逮諸法不侵行精進故。諸法調定於柔順法無所侵故。諸法說之無侵光曜焚燒諸法。於無起法而無侵故。信一切法於所好法亦無侵故。說一切法於諸言教無所侵故。諸法

本無於無趣法而無侵故。諸法審諦等三世法亦無侵故。諸法常住於不動法亦不侵故。諸法有哀隨本所樂而爲現法故。諸法悉等說無差特故。諸法求跡示現諸法至平等故。諸法所至示現入深道門故。諸法至力現諸上法故。諸法愚冥爲現智明故。懷來諸法示現諸法無所亡失故。總持諸法示現諸法爲無盡故。諸法寂然現憎怕故。諸法虛空而爲示現廣普之法故。諸法無明現癡本故。諸法悉住現所立處故。諸法入慧現離癡法故。諸法人也而爲示現分別諸法故。諸法離有而爲示現離所有法故。諸法有難而爲示現諸法瑕穢故。諸法常念而爲示現宿命事故。諸法有緣示現諸法而有侵故。諸法入志而爲示現寂諸亂故。諸法極重而爲示現無所動法故。諸法住處而爲示現衆法界處故。諸法導師而

爲示現審諦之法故諸法致果而爲示現志無所念故諸法唯陰而爲示現蠲除五陰諸法苦患故諸法生死示現諸法無塵故諸法寂空示現諸法無所猗故諸法如固示現諸法斷衆固故諸法寂滅示現諸法斷因緣故佛說龍王是名曰文字緣會無盡藏總持菩薩得是分別一切文字所興譬如文字而不可盡諸法所說不可盡亦復如是譬如文字亦不從身出不從心出諸法如是不可知處不住在身不住在心譬如文字無所依倚而求解說塵勞之事亦無所淨菩薩已得無盡藏總持雖說塵勞不著塵垢究竟本淨譬如文字不合在身然爲他人有所解說諸法如是有所發起教心清淨如文字有所說時無所至湊無所言時不處在內諸法如是假使說時無所至到設不說時不積在內如文字無色無

見而現在外諸色如是無色無見由心因緣而有退轉如文字虛自在寂寞悉以怱惱無作字者諸法如是虛靜寂寞莫有造作如文字不出染汙貪瞋恚愚癡又因文字而有音教諸法如是不出染汙貪駁之惑由從想念起姪怒癡如文字因諸貪緣說得果證文字無得亦無有證諸法如是因其緣對說有果證計於本法無果無證譬如諸法無不因字諸行如是所有諸法皆由佛道

總持身品第六

佛語龍王菩薩已住無盡藏而以文字求於佛道總持文字力也歸趣文字身也滅盡像色也入法門頂也觀瞻額也慧眼眼也天耳耳也說名字鼻也制亂意眉間闕庭也攝一切心面也解喻一

一切可衆生心舌根也。調定其心齒也。師子觀奮迅鬚也。藏匿空語脣也。觀一切法咽也。勉出衆生令其歡悅肩也。端正所謂脾也。察諸法等腹也。入於深門臍也。入左右路掌也。合會諸法臂也。十善之句爲善救護指也。清淨法銅爪也。來致虛無之念脇也。次第講法脊也。說不侵時無所爲度尻也。具足寂觀饗也。趣審諦法膝也。曉知一切蹠也。心意寂然足趺也。遊到十方足心也。次第說諦步也。知羞慙耻衣也。法鬘莊嚴傅飾也。法華若干臥具也。說種種法枕也。不瞋不諍塗香也。所行如應無所不了雜香也。入深戒說香也。於諸法自在眷屬也。嗟歎梵跡則親友也。得安隱衆知識也。斷諸結縛開化衆人則親暱也。曉了諸事家室也。其心清淨母也。一切巧便無所依信慧父也。諸通慧心從等也。施度無極漿食也。戒

度無極泰安也。忍度無極莊嚴也。精進度無極作善剋辦也。一心
度無極飽滿也。智度無極隨時順也。善權度無極二句合義也。道
品身支黨也。講說至誠未曾侵欺。一切世間尊豪自由於法自恣。
佛語龍王是爲無盡之藏總持無色像身也。其有菩薩於是總持
樂其之樂。譬如國王在於中宮。如天帝釋在須彌頂威神巍巍。如
梵天尊豪自在。如燕居阿須輪難可制持。如海無邊功德超殊。如
寶大山天所娛樂。如父母獨有一子愛重無極。如月盛滿衆星獨
明莫不稽首。如世尊爲天世人奮大光明。如日初出光曜柔和。如
孔雀在林樹間放妙音聲。如師子在巖窟中服美飲食。如龍心意
調和以時澍雨。如轉輪王大法化國。如衆龍舞動發雷電。如龍王
已得自在降大法雨。如天帝釋撫化一切諸外異道。如勇猛將摧

伏嚴敵除諸勞垢降納衆魔如水消火如風靡草心計如地開化
明者隨化衆生如火焚草皆忍苦樂如乳母養長者子療治衆病
持心堅強具衆人願如意珠王總持諸寶佛語龍王其有菩薩住
無盡之藏總持門者則可謂入佛之道場如大海含受衆寶諸珍
苑府無盡之藏總持如是包弘諸法道寶篋藏如無數香篋令無
量人恣意所欲菩薩已住無盡之藏總持門者以真妙言開化一
切令各得所是總持者入一切聲此土名道心者彼無盡世界佛
一寶蓋如來國曰目前此名諸通慧者彼超得度世界導龍如來
佛國曰普達此名施度無極者彼寂定世界吉祥如來佛國曰精
氣此名戒度無極者彼無憂世界離憂如來佛國曰多安此名忍
度無極者彼無垢世界離垢如來佛國曰無盡句此名進度無極

者。彼普明世界無垢光如來佛國曰上度。此名專度無極者。彼道御世界堅要如來佛國曰寂行。此名智度無極者。彼陰雨世界雨王如來佛國曰清淨。此名善權方便者。彼尊調世界離垢辟如來佛國曰隨習俗宜。此名慈哀喜護者。彼豐盛世界吉祥義如來佛國曰憐傷仁攝彼我二寂。此名苦習盡道者。彼無悅世界首寂如來佛國曰本原由根原盡歸本。此名四意止者。他方世界曰無止。此名四意斷者。彼曰上勝。此名神足者。彼曰超步。此名五根者。彼曰悅原。此名五力。彼曰堅強。此名覺意。彼曰無冥。此名八由。彼曰所度。此名分別。彼曰目見。此名護仰。彼曰隨順。此名法施。彼曰善攝。此名寂觀。彼曰定察。此名脫門。彼曰離癡。此名功德。彼曰嚴辦。此名智慧。彼曰了便。此名棄家。彼曰修行。此名具戒。彼曰無犯。此

名安隱無爲。彼曰寂滅度。此名曰嘆佛無量。彼曰佛曰佛眼放光。佛語龍王。計諸佛國音聲言訓若干種教。菩薩若逮無盡之藏。皆知一切諸佛之土所說音聲文字所誨。佛以一劫若過一劫。讚歎有爲言說章句之教。十方所出。不能究竟諸佛國土音聲義也。佛說是無盡之藏。總持門時。六萬菩薩皆得總持。八千菩薩得不起法忍。三萬二千人皆發無上正真道意。

總持門品第七

爾時佛告龍王。菩薩以是離諸幽冥之路。趣諸通慧。往古不可計無央數劫不可思議。彼時有佛号曰梵首天王如來至真等正覺。

明行成爲善逝世間解無上士道法御天人師号佛世尊。世界曰集異德劫名淨除彼時集異德世界豐盛安隱五穀自然快樂無極天人繁熾如我此土百億四域合爲一佛國則爲彼土一大四域如是之比百億須彌山此梵首天王如來集異德世界廣大無邊乃如茲乎其世界如金剛光明摩尼之寶自然常普大明以寶交絡周匝覆蓋懸繪幢幡百千伎樂於虛空中不鼓自鳴其伎樂音普聞佛土彼伎樂音不出姪怒癡欲之音聲也唯演寂然憺怕法樂歡喜之音諸天人民聞樂音者則逮一心寂定安隱晏然不爲塵勞之所危害也其土平等如柔軟衣無有惡趣音聲誨也天人清淨皆解微妙志于大乘少求聲聞緣覺之乘心有所念依食室宇所欲隨意悉自然至天人一等無有窮厄匱乏者也衣服飲

食如兜術天上。其國所有等無差特。其如來壽命滿六十七萬二千歲。其土人民壽亦復如是。無中夭者。佛土菩薩七十二那術。聲聞甚少。爾時有轉輪聖王号無盡福。主十六四天下。其無盡福王有八十四那術夫人。如天玉女。有四太后。一名離垢。二曰無垢光。三曰清淨。四曰淨句子。有八萬四千皆大猛勇身相。有八端正姝好。皆志大乘。彼時無盡福王處於大城。名曰具樂。其城東西長二千四百四十里。南北亦爾。梵首天王如來興於彼國。無盡福王建立精舍殖大林樹。名上香光園。佛所遊止。城之中央造玉宮殿七寶合成。城中有八萬四千街巷。八萬四千欄楯。一一街巷有八萬四千家居。其大城壁七重。七重欄楯七重行樹七重交路。繞城有萬遊觀園。其塹七重滿八味水。生青蓮紅蓮黃蓮白蓮。皆有美香。

鷲鳬鳩鴈相隨而鳴。其城如是名等無量不可思議。王供養佛奉進所安。衆事具足無所乏少。於百千歲不可稱限。率其宮中子孫親族友黨眷屬國中人民。往詣上香光叢林。見梵首天王如來。稽首佛足退住一面。佛告王曰。有四事爲大國王君子聖主。猶得自在與衆不同。增益善法。何等爲四。立於篤信數。詣賢聖。樂欣請益。求德慕義。以法自娛。常觀無常苦空。非身之法。觀世所有。有爲之穢皆歸離別。自攝其心入無放逸。覺察欲樂無所饒羨。不以毀斷宿世福德。不廢道心務志妙慧。是爲四事大國聖主。猶得自在與衆不同。無盡福王白世尊曰。菩薩有幾法而得自在。佛告王曰。菩薩有八法而得自在。何謂爲八。得五神通以自娛樂。未曾有退無所罣礙。并除瞋恨而無害心。具暢聖慧攝于道明。所作已辦現得。

觀達誠信神足拔諸所有以智慧聖捨離一切邪見塵垢得四解明佛所建立無著不住具足力處逮于無盡福海印三昧能悅衆生攝御一切諸佛之教以成總持其心清淨所聞不忘應如所欲而爲說法入一義味住於本際不計吾我不起法忍是爲八事菩薩而得自在佛告王曰又有總持名曰寶事菩薩逮得此總持者於法自在時佛爲王說寶事總持之慧滿百千歲普分別義王捨國事一切衆緣專精一心及與眷屬聽受道化於百千歲未曾想欲無瞋恨意不含想害不顧妻子國土眷屬一切所有永不以計唯願法樂立志佛道大慈清淨等心一切而行大哀被大德鎧而聽受法如是之比具百千歲受佛誨已因此寶事總持之要所作則辦越七百萬劫終始之患積十萬劫除諸罪殃見億百千佛從

受德本於恒沙等作天帝釋。若爲梵天轉輪聖王。積功累德。以清淨心志。御諸法用心不亂。聞百千佛受法不忘。時王諸子皆悉逮得柔順法忍。中宮媛女八萬四千普發道意。爲菩薩學。八萬四千人逮得法忍。九十那術諸天人民皆發無上正真道意。三十六那術學聲聞乘得法眼淨。萬六千比丘漏盡意解。無盡福王棄國捐王不慕天上世間諸樂。唯志無上正真之道。因家之信出家爲道而作沙門。諸子亦然。皆作沙門。時國人見王棄國六萬人悉爲沙門。中宮媛女四大夫人亦爲沙門。佛教清淨普蒙安隱殖諸德本衆行具足。佛言。龍王爾時無盡福王轉輪聖帝非是餘人則爾身是也。爾時轉輪聖王諸子今此會中諸菩薩大士是也。時彼梵首天王如來爲王無盡福所說寶事總持。則今佛所說無盡藏總持。

是佛語龍王今如來以無著慧觀察人本而爲說法從無央數百千億那術諸佛聞無盡藏總持以此數聞之故今乃如斯志念強勇獨步無礙辯才難及志懷智慧若有菩薩聞是無盡總持之名其有說者皆當逮得無著辯才所以者何由是總持後當來世是離垢總持所流布處皆是如來之所建立八萬四千法藏是總持門爲首面也八萬四千行皆來歸於總持八萬四千三昧皆從總持八萬四千總持無盡之藏總持爲本原佛語龍王假使菩薩無住無著於四解義則降大法雨皆來依猗此無盡之藏此無盡之藏總持所入正句次第順章諸天龍神香音神無善神鳳凰神甜柔神皆共營護

緣應意隨順意欣樂跡直意越度無盡句次第

曜面 光目 光英 志造 淨意 行步入 勇力 濟冥
所持 爲上 寂門 入寂 滅塵 離居 居善 隨順 離
次 無所至 所住 無所住 至處 無至處 要御 速慧
智根 轉本根 月光 日轉焰 光善離垢 無垢 淨諸
垢 覺所建立 諸天祐 護諸魅 告乘 梵知化 釋咨嗟
四天護 衆聖愛 仙人歸 諸姓修行 解牢獄縛 天人
所攝 捨諸塵勞 破壞衆魔 降伏外道 攝欲明智 開化
自大 不犯法師 不亂衆會 悅可樂法 護於法音 不斷
三寶 慈愍衆生 讀慕德義

六十二事

佛告龍王是諸法句爲護無盡之藏總持其有法師受是章句六十二事若諷誦者得三十二無所畏何謂三十二博聞無畏咨嗟

他人處處無畏。言無缺短如應無畏棄捐鄭重而無所畏。隨音所入辯才無畏。無所罣礙其心無畏。奉受道心其志無畏歡悅衆人行步無畏。速決狐疑覺意無畏。觀察衆人無闕無畏。言行相應無缺無畏。戒禁清淨心面無畏。忍辱清淨堅強無畏。於審諦願而不轉還所處無畏。心不謬亂辯慧無畏。能悅衆會智慧無畏。知深妙法降化無畏。離於調戲師子無畏。伏諸外道無受無畏。無衣食悅無瑕無畏。降伏衆賊令住正見無愆無畏。智者不毀導御無畏。不亂衆經說等無畏。隨時而教無詭無畏。言行相應離慢無畏。見一切人謙順無畏。無盡句本行修善發遣所問無畏。開化一切無量法教隨衆無畏。己身淨故降魔無畏。除諸塵勞大悲無畏。心不懷害大哀無畏。將護衆生智慧無畏。以法治國。佛語龍王。菩薩聞是

無盡之藏總持歡喜信。便得三十二無畏。假使不斷。是三十二無畏。稍稍漸成如來四無所畏。佛之所以有無所畏。諸天人前爲師子吼。恣聽一切所可欲問。都無有人能來窮極如來之智。亦不敢斷佛所說。是故菩薩欲致是無所畏者。當學行無盡藏總持。何所是總持所學行。無眼行無色行。無眼色識行。無耳行無聲行。無耳聲識行。無鼻行無香行。無鼻香識行。無舌行無味行。無舌味識行。無身行無細滑行。無身細滑識行。無心行無法行。無心法識行。無色行。無色生行。無色滅行。無色處行。無痛想行。識行無識生行。無識滅行。無識處行。一切無行。是應總持行。復次龍王。其行色空心不空色。是應總持行。痛想行識。其行識空心不空識。是應總持行。復次其無想色行。不念無想行。是應總持行。痛想行識。亦復如是。其

無想識行不念無想識行。是應總持行。復次其不斷色行。於色行無行。不色生行。不色起行。不色寂行。色如諦行。色如本淨行。亦不念色如諦。本淨行。是應總持行。痛想行。識亦復如是。其不斷識行。於識行無行。不識生行。不識起行。不識寂行。識如諦行。識如本淨行。亦不念識如諦。本淨行。是應總持行。復次於種由法界行。不想法界行。不想法界諸入本淨空行。不想本淨空。是應總持行。若一切法緣起之行。不想緣起。是應總持行。不著諸法行。不猗不著行。是應總持行。諸法如本無行。不壞諸法本無之行。若於諸法住本際行。不念本際住諸法行。是應總持行。復次其知貪欲行。不於法界想念貪欲行。是應總持行。其知瞋恚行。不於法界想瞋恚行。是應總持行。其知愚癡行。不於法界想愚癡行。是應總持行。其等分

行不於等分行於法界有所壞行。若於八萬四千諸所修行。入于法界無若干行。是應總持行。若行若合行。於行合行而無所行。亦無不行。所以者何。其行無量亦無所度。亦無所想。是故彼行爲平等行。於平等行亦無所毀。亦不有爲。亦不無爲。亦不受亦無不受。無處無住。故曰平等行。菩薩行如是。則得無盡藏總持之門也。於是世尊則說頌曰

其人心意則清淨 普入經卷度無極 悉解衆人之音聲
得總持時乃如是 觀知群萌心所行 善惡所念及中間
分別本性所造興 則爲說法隨所應 悉了因緣之報應
令不覩常及無常 皆以棄捐墮邊際 分別總持隨順化
明解文字之方便 知無央數之音響 曉了義理微妙好

得總持者乃如是
無量智慧知衆行
至無量國須臾頃
若干億魔至百千
講說經法無數千
常以解脫諸有無
衆人觀仰無厭足
天帝釋梵及護世
得總持時亦如是
溫潤流利言得時
爲師子吼妙無難
逮得天眼無垢汙
念億千劫去來事
供無數億諸導師
不能覩知境界行
譬如蓮華無著水
等心一切如虛空
進止安詳行無缺
皆以恭敬稽首禮
口言柔軟如梵音
所可教化無所覆
降伏一切衆魔人
天耳清淨亦如是
獲四神足亦如是
聞所講法則總持
清淨之人無塵埃
不猗世法亦如是
持最色相而勇猛
愍傷群萌故遊世
其心不以憍慢說
爲衆人說可其心
在於衆中無所畏
得淨總持爲如是

其諛詔人難調化 興于憍傲而自大 聞彼聖明所說法
即棄貢高稽首禮 入於本淨寂法界 以達義歸解諸法
以故所說無窮已 分別文字知法律 人之本性法界淨
曉衆生淨亦如是 解知本無人本無 所說經法無罣礙
所盡無盡不可知 無盡之事無能盡 覺了知是趣寂寞
則說無住億經卷 斯諸文字不處身 亦不在意不住心
文字本性空寂寞 譬如山中呼聲響 計總持者不著字
無音無言無說聲 以知文字所趣然 假使所說無罣礙
無意無想亦無心 設有所說無所念 又復解知去法慧
講順說經隨所應 以入分別四句義 晓了義理明識法
究暢音聲順所聽 故講無著不可量 驚習本原承其慧

故說深要若干法 所解之慧了逆順 有趣頂法度無極
方便所有諸怯弱 以用救攝諸卒暴 以明識所作爲解說
得總持者乃如是 其身口意皆已寂 分別諸慧不著古
所言無厭除瞋恨 得住總持爲勇猛 其所總持心執御
意之所入住法慧 其有聞者未曾忘 順如聽采等經典
其總持義法不亂 計法行之無所入 以法等故曰平等

如應平等順清淨

分別名品第八

佛說此章句偈時海龍王眷屬萬三千龍皆發無上正真道意則

更啓曰。廣宣此言。唯然世尊。我等亦當逮是無盡之藏總持也。當爲一切衆生之類廣說經法。爾時賢者舍利弗白佛言。至未曾有。世尊。乃令諸龍發無上正真道意。人反不能發大道也。佛告舍利弗。是萬三千龍。迦葉佛時皆作沙門。從迦葉如來一反聞菩薩行。同時歡喜讚曰。善哉善哉。說大乘事不可思議。與族黨知友俱行分衛。貪利不愼。不護禁戒。以是之故。壽終之後墮於龍中。彼時從迦葉佛聞大乘教。讚迦葉佛。因由報應德本之緣。今聞吾說咨嗟大乘。講無盡藏總持。皆發無上正真道意。舍利弗。觀是至心之奇特。今吾授決恒沙等劫供養諸佛積累道品。自致得成無上正真道。號曰慧上智上法上梵上。得成佛時以是四事。号世界曰無垢藏。劫名大欣。皆同一劫得成無上正真道最正覺。猶如賢劫當興。

千佛

授決品第九

於是海龍王白佛言。我從初劫住止大海。從拘樓秦如來興於世來。大海之中諸龍妻子眷屬甚少。今海龍衆妻子眷屬繁裔弘多。設欲計校不可窮盡。唯然世尊。如此云何有何變恠。佛告龍王。其於佛法出家奉律行戒不具。現戒成就違戒犯行。不捨直見不墮地獄。如斯之類壽終已後皆生龍中。佛語龍王。拘樓秦佛時。九十八億居家出家。違其禁戒皆生龍中。拘那含牟尼佛時。八十億居

家出家毀戒恣心壽終之後皆生龍中迦葉佛時六十四億居家出家犯戒壽終之後皆生龍中於我世中九百九十億居家出家若干鬪諍習若干行誹謗經戒壽終之後皆生龍中今有生者佛語龍王以是之故仁在大海中諸龍妻子眷屬不可稱計我般泥洹後多有惡比丘惡優婆塞違失禁戒當生龍中或墮地獄海龍王白佛言於今棄家爲道犯戒比丘墮龍中者有何殊特佛言棄家學行於今犯戒比丘墮龍中者行於方便不能清淨又有至信心於佛法以至心力龍中壽終生天上人間當見賢劫所興諸佛皆當見之假使不以解脫者悉於跋陀劫中般泥洹除志大乘者龍王且觀佛教廣大因緣出家之奇特棄諸惡法得超異類爾時有龍王子号曰威首前白佛言至未曾有世尊龍近如來難值難

聞雖有所毀作衆罪殃發一善意心念佛法終不失德緣是之行至得滅度今我願發無上正真道意用佛世尊難值難聞令菩薩行無有違缺至于道場莫使心中忘失德本大慈大哀大喜大護所生之處常見諸佛得聞經法供養衆僧開化衆生爾時世尊告威首龍王子曰善哉善哉仁者之間乃發救護一切之心今汝至心興無極哀而起道意緣彼德本如來嗟嘆七日七月若至一年爲功德福而不可盡所植善行乃如是也佛見威首龍王子心之所念即時欣笑諸佛笑法無央數色色各異光從口出照不可計諸佛世界遶身三匝還從頂入爾時賢者阿難以偈讚佛

百福功德莊嚴身 體諸相好三十二 清淨無垢如月光
今之所笑何感欣 靜無塵埃離三垢 如百葉華行無惱

天人龍神所奉敬 安住今者何因笑 善哉平等齒普淨
十力威曜面香潔 已除生死之根原 今者世尊笑何感
心如虛空無瑕穢 意等善友及怨家 持志如地無憎愛
唯願世尊笑何欣 音聲所講喻梵天 猶雷哀鸞微妙響
所說柔軟莫不歡 唯願世尊歎因緣 心於聖慧無所著
知三世人意所行 解衆人根得喜悅 導師今笑爲何感
以爲成醫王 療治衆生病 能施究竟安 世尊笑何緣
護德爲我說 諸天人民聞 皆當懷喜踊 即志諸通慧
佛告賢者阿難 寧見威首龍王子住於佛前至意發無上正真道
意不。阿難對曰。唯然已見佛言。是威首龍王子過八百不可計會
無央數劫。當得作佛号慧見如來至真等正覺。世界名淨住劫。曰

明察是龍王子至誠奉行菩薩之道。見無央數諸如來供養奉事。
常修梵行開化度脫無量衆生使立三乘慧見如來淨住世界。豐
熟安隱五穀平賤快樂難量天人充滿猶如炎天被服飲食其佛
當壽百萬歲賢聖衆僧聲聞有六十億菩薩百二十萬億慧見如
來其有觀者皆得慈行三昧慧見如來說經聲聞行者若始見佛
則得道跡再見得往來三見得不還四見得無所著志菩薩乘者
適觀慧見如來得柔順忍再見獲神通三見得總持辯才四見得
不起法忍淨住世界無毀戒者意淨無邪皆住正見壽終之後無
有惡趣悉生天上清淨佛土時威首龍王子聞佛授決歡喜踊躍
善心生焉奉百千珠瓔用散佛上而叉十指以偈讚曰

人尊無垢如月光 威神無量衆所奉 其力無限總持世

願稽首禮無邊慧 慈哀之聖不可限
禁戒廣普住正定 稽首人尊如虛空
所行究竟無不入 以故曉知諸衆生
若人覩觀尊顏容 一心察之無厭足
愛欲之穢皆滅盡 哀鸞拘夷諸鬼神
聲聞十方甚微妙 如來之音超於彼
海水當竭須彌壞 虛空尚裂地反覆
世尊至誠以諦說 譬若如日墜於地
得佛自在爲衆祐 授我之別大聖慧
假使有人發道心 十方無量億方國
若人志發尊佛道 前所植德不及此
則爲報恩諸十力 用不斷此導師命

龍王子說此偈讚佛已。十千人皆發無上正真道意。悉說是言。慧見如來逮得最正覺時。吾等同心共生淨住世界。奉彼如來正法之教。又供養之。佛滅度後次補其處得最正覺。佛皆授決。悉當令生淨住世界。

佛說海龍王經卷第二

佛說海龍王經卷第三

西晉月氏三藏竺法護譯

請佛品第十

爾時海龍王白世尊曰。唯佛加哀諸天龍神及無量人。令致安隱。至于大海。詣我宮中屈神小食。所以者何。大海之中有龍鬼神香音神。及餘無數衆生之類。見如來已皆殖德本悉當往會。因聞法音除斷無底生死之源。吾等龍宮并蒙其恩。天上世間緣得度脫。如來普現佛大道心。令我等身近道品法。佛愍龍王默受其請。及無量人悉當廣殖衆德之本。時海龍王見佛就請歡喜踊躍稽首。佛足右繞三匝。與眷屬俱忽然不現。還在大海聚會龍民。而告之。

曰吾明日請佛佛垂矜許汝等同心當俱供養海龍王又告燕居無善神誑惑縛補離垢錦等曰諸仁當知如來降神當詣此海乎宜用身故率諸眷屬來集吾宮獻饌世尊又勅龍王名曰主度王歎無量王離垢王焰光王戲樂王清淨王妙曜意王現諸難王及餘龍王百千之衆悉當來會至吾宮裏奉觀如來又勅龍子威首曰仁者致敬宣吾命於無焚龍王命諸海宮供養如來至真等正覺即時受教又勅龍王子強威詣安明山頂請歡喜龍王迦歡喜龍王及天帝釋使諸仁者令詣大海集吾宮內供養如來時強威即時受教宣令如是時海龍王化作大殿以紺琉璃紫磨黃金而雜校成則建幢幡造金交露寶珠瓔珞七寶爲欄楯而極廣大若干種香而以熏之散衆色華紛紛如雪於大殿上化立師子之座

高四百八十里皆以衆寶而合成。數無數百千天繒以爲綻繩。諸菩薩及比丘衆所坐師子座各各嚴麗階級殊別饌具兼重若干種味寂然飲食供設以具爾時龍王明旦修敬住安明山十二之坎與眷屬俱遙請世尊以偈頌曰

殊特慧無量於法得自在明知成衆事如空聖無限
離垢眼清淨於世爲最上日時今已到唯加哀自屈
清淨音如梵柔軟聲和仁響雷如哀鸞爲衆現甘露
除若干塵冥爲衆最上醫人中寶願來今正是其時
心調柔寂寞志軟常安和自度濟衆生願救諸人民
開化衆黎庶使越彼四瀆造安度彼岸惟屈今是時
調仁樂布施學道戒清淨忍辱力最上已獲大精進

滅除禪脫門 智慧普無量 言誨如月明 住聖時已到
智跡方別路 邪徑永已斷 七覺意根力 化現以四諦
平等四意止 四神足意定 總得普通達 時到宜屈神
三十二相明 英妙百功德 爲存德義者 示現大福田
尊稱爲衆祐 如春萌滋茂 唯愍傷加慈 大哀自屈神
志如須彌山 心等譬如地 除愛及瞋冥 所說如演空
人尊不自卑 未曾有貢高 歸於空脫門 屈神今正時
知義尋分別 曉了隨順要 究暢解經法 心行常如斯
顯進人本性 觀察諸慧義 稽首最勝足 時到屈神臨
爾時世尊遙聞龍王啓白。時到告諸比丘。著衣持鉢當詣大海開化衆生就龍宮食。比丘應曰。唯然。於時世尊與諸菩薩比丘衆俱

眷屬圍繞。踊在虛空。身放大光明。而雨天華。百千伎樂相和而鳴。集于海邊。至欣樂園。有思夷華名曰意樂。佛住止彼。時海龍王往詣佛所。稽首佛足。陳敬已畢。却住一面。龍王自念。吾欲化作寶階。從海邊至海底。令佛及比丘衆及諸菩薩。由是下海至我宮中。如昔世尊化作寶階。從忉利天至閻浮利。適設此念。便從海邊化作三寶階。金銀琉璃。下至其宮。甚微妙好。於是世尊以威神力。化大海水。令不復現。使海生類不以爲患。佛身放光照于大海。普至三千大千世界。其海居類身蒙此光。皆懷慈愍柔仁之心。不相嬈害。相視如父如母。如兄如弟。如子無異。於時欲行天人。色行天人。侍從世尊。欲聽道化。猶欲觀龍王莊嚴宮殿。時佛與諸菩薩及大聲聞諸天龍神。香音神。無善神。鳳凰神。山神。甜柔神。釋梵四天王。從

欣樂園思夷華樹欲詣龍宮佛昇寶階涉於中階諸菩薩衆住在右階諸大聲聞住在左階時六十億釋而在前導六十億梵天皆在虛空各執寶蓋六十億天皆在佛後而雨天華六十億諸欲天人作諸伎樂而供養佛六十億魔衆皆於佛前香汁灑地六十億龍后在虛空中各現半身手執珠瓔垂散佛上六十億山神皆鼓伎樂歌佛功德六十億香音神手執華蓋以用奉佛六十億無善神各持若干百千種衣以覆佛上無焚龍王與億百千眷屬在於虛空皆以華香雜香搗香作衆伎樂莊嚴諸龍及諸天華以供養佛如是比類六萬龍王皆供養佛欲見世尊觀海龍王安樂世界無量壽如來佛土菩薩号光世音大勢至大士與無央數億諸菩薩俱爲佛世尊示現莊嚴諸所有供養皆令前所嚴供隱蔽不現

無能知者。焰氣世界難逮。如來佛土菩薩。號法英法道大士。妙樂世界無怒。如來佛土菩薩。號香首衆香首大士。照明世界月辯。如來佛土菩薩。號師子師子音大士。不珣世界善目。如來佛土菩薩。號導御諸法自在大士。光曜世界普世。如來佛土菩薩。號寶場寶焰大士。樂御世界寶首。如來佛土菩薩。號慧步慧見大士。光察世界普觀。如來佛土菩薩。號雨王法王大士。愛見世界尊自在王。如來佛土菩薩。號退魔后魔王大士。取要言之。如是十方各各無央數億諸菩薩。皆來歡樂。海中龍王欲見如來供養奉事。於是世尊以大道力。諸佛感動。威德所監。以佛弘威勸化無戲供養諸佛。放大光明徹照十方無量世界。以佛洪音大師子吼。而講言化諸天百千。皆作音樂而雨天華。滅諸惡趣施於一切安隱之具。有三昧。

名曰立於大哀歡悅群萌以佛三昧正受已所作莊嚴光飾大海不可思議佛從寶階降神海宮自然音樂普聞十方無量世界佛之威神如來所感皆見能仁如來下于大海彼時億百千玉女魔妻無善神鳳凰神山神甜柔神群神婦女皆以伎樂而行迎佛調諸音樂而歌頌佛德

施上戒清淨	忍力慈心尊	精進勤御義	禮樂禪脫門
心淨光慧智	嚴明奮威神	現在示解脫	故來除垢塵
施以甘露安	道御罄衆穢	無盡德如空	慧海願降海
所說具足要	讚歎度無極	施眼明清淨	一切人中上
歎頌深義句	愍人光無倫	等祠所宣普	降伏諸異道
施以法無慳	講經淨恣塵	讚歎實慧光	道財敷演珍

見諦莫不受 正觀斷結著 不動如山根 願稽首導師
諸天金翅鳥 須倫真陀羅 迦留鳩垣師 願稽首足下
尊相三十二 無比妙善現 體柔紫金色 爪足下安平
妙響如哀鸞 其聲踰梵天 大音超三千 稽首柔軟音
根調心寂寞 猶如月電光 言誠常平等 願稽首樂法
已度老病苦 救一切令脫 得勝伏衆魔 滅除生現盡
無著蠲塵勞 爲諸天所敬 歸尊普救護 導師開化衆

十德六度品第十一

於是王女及諸龍后無善神鳳凰神山神甜柔神后共讚佛已。一

切同等皆發無上正真道意。脫身瓔珞用散佛上。佛與衆俱降于大海。到其海城詣海龍王莊嚴大殿坐師子座。時諸菩薩及比丘衆各各次坐其座。於時海龍王與中宮眷屬俱見佛坐已。手自斟酌寂然飲食。無央數味供養佛及比丘僧。飲食畢訖行澡水竟。坐佛前聽經。及諸天龍神香音神無善神鳳凰神山神甜柔神釋梵四天王及十方諸來會菩薩。於是佛見衆會坐定。從身放光。光名善度脫法柔和。悉照大海諸居之類上中下品。普自見佛歡喜踊躍願樂聞法。各以恭敬遙稽首佛。爾時世尊告海龍王。猗世間者作若干緣。心行不同罪福各異。以是之故所生殊別。龍王且觀衆會及大海若干種類形貌不同。是諸形貌皆心所畫。又心無色而不可見。一切諸法詭詐如是。因或興相都無有主。隨其所作各各

自受譬。如畫師本無造像。諸法如是而不可議。自然如幻化相皆心所作。明者見諸法因或興相。則當奉行諸善德者。其解或相興成諸法蔭種諸入。當歡喜悅得好端正。龍王具觀如來之身。以百千福而得合成。超於衆會普現巍巍。其百千德由得自在。而使梵釋覆蔽不現。觀如來身目不敢視。當其威光察諸大士。色身相好莊嚴具足。皆以善德校飾其體。佛語龍王。仁所嚴淨皆因福成。諸釋梵天龍鬼神香音神無善神鳳凰神山神甜柔神。所有莊嚴皆因福生。今此大海若干種身。善惡大小廣狹好醜。強羸細微皆自從心而已獲之。爲若干貌悉身口意之所作爲。是故龍王自護身行救濟罪福。當作是學。汝等以護身行救濟罪福。奉行諸善得成佛道。滅棄邪見不住有常無常之見。當求衆祐已殖供養。因供養

故當爲諸天世人所敬。佛語龍王。菩薩有一法。皆斷一切惡趣衆難。何等爲一。專察妙法。云何正諦。入於法樂多觀善法。不聽諸惡衆邪之想。已斷惡法。奉行衆善。在在所生。與佛菩薩賢善性俱。佛言。何等善事。已立德根。天人之安。不爲聲聞緣覺之本。立道本者。志無上正真道。何謂立本。謂行十事。何謂十身。不殺盜婬。口不妄言。兩舌惡口。綺語意不嫉恚癡。是謂立本。佛語龍王。人不殺生。得十善寂法。何謂十。常施安隱於一切人。常樂慈心。斷瞋恨心。所生之處。常無疾病。常種長命。爲非人所護。臥安寤歡。未曾惡夢。不懷怨結。不畏惡趣。壽終之後。得生安處。人不殺生。得斯寂法。以不殺生。善本之德。願志無上正真之道。若成佛時。而得自在於壽命也。佛告龍王。人不盜竊。得五信法。何等五。得大富無有。縣官水火盜。

賊怨家惡子能竊取者。衆所愛敬。到處寂然。所至無難。患畏永除。以不取之福。志存慧施。殖衆德本。志願無上正真之道。以依如來無見之慧。成最正覺。使立神通。佛語龍王。人不犯邪姪。得四明智所歎之德。何等四攝護諸根離諸調戲。一切世間悉共稱歎。已離邪姪。無敢輕眄其妻室者。以是德本。志願無上正真之道。得大人相馬陰之藏。佛語龍王。人不妄語。諸天世人以八法歎。何謂八。得面清淨。語言中當一切世人所見任信。自成其證。天人所敬。心懷至誠而無邪想。心意清淨而無諛詔。多所歡悅。無患厭者。能受禁誨。無有麤言。生天上人間。獨見任信。無有疑者。以至誠言善德之本。志願無上正真之道。因此所行。常得至誠。佛語龍王。人不兩舌。得五不別離。何等五。身不別離。無散亂者。眷屬不散。不傲他人。得

信無壞見於緣報他無壞法以行爲要得親友和用無欺故以是德本求最正覺得成如來眷屬無亂一切衆魔及與怨敵終不能壞如來眷屬佛語龍王人不惡口得八清淨言辭之報壽終之後得生天上何等八所說如諦所言柔軟所言如應所言和順所言能受所言光曜所言衆人莫不承樂所言衆所不譏因是德本志願無上正真之道得成如來音聲超梵佛語龍王人不綺語得三正行何等爲三常爲衆明諸等敬愛心常專一入于至誠不以多言於天上人間常得大尊不爲雜碎以是德本志願無上正真之道爲佛所授決得成如來所言無異佛語龍王人不嫉妒得五威神何等五身口意明諸根具足得極財富而以自恣降伏諸冤樂於飲食美味生活之業福德巍巍爲諸國王所見恭敬而蒙覆蓋

如己所有微妙之寶致差特家功德宿本不嫉他財因是德本志願無上正真之道成等世尊三界所奉佛語龍王人不瞋恚得八心歡喜法何等爲八無害樂諦滅除瞋恚樂於誠實心不樂諍心樂質直安祥而和等於聖賢常懷慈心愍傷具足見人安悅端正殊好衆人所敬生於梵天不以爲難心以方便哀和之故是爲八因是八德本志願無上正真道意得爲如來至真等正覺觀無厭者佛語龍王人不邪見得十法德何等十志性真實得人善友信善惡之報若己沒命不傷犯人念行佛道心無有異不事天神志懷質朴捨於諛謗神呪之術與諸天人以爲朋友不與地獄餓鬼畜生而作伴侶與衆特異功德巍巍聖道爲上離於邪見離於貪身離於惡見都無罣礙於聖平等須臾之間生天上人間是爲十

德法已離邪見得本志願無上正真之道近得諸佛道法速逮神通成爲如來佛語龍王菩薩離於殺生而行布施常得大富長壽無極行菩薩道一切外怨莫能當者已離盜竊而布施者既饒財寶人不敢取行菩薩道無能妨廢合聚一切功德之法離於邪淫而布施者後常大富妻無逸態在於人間無敢犯者其家女人而不色視離於妄語而布施者常大富有不被誹謗以下劣人皆蒙擁護行菩薩道言行相應所願堅強離於兩舌而布施者常大富有眷屬不別行菩薩道則得菩薩一切眷屬質直等性已離惡口而布施者常大富有所言人受行菩薩道入於衆會莫不欣樂離於綺語而布施者常大富有所言輒行行菩薩道斷一切疑離於嫉妬而布施者常大富有喜好衣食牀臥具足行菩薩道已所喜

者而以加施得大尊豪離瞋恚心而布施者常大富有威耀端正所言說者衆人愛樂行菩薩道心無加害諸根具足離於邪見而布施者常大富有立於正見生於族姓值佛世尊行菩薩道不離諸佛常得聞法發菩薩心佛語龍王是謂十善布施莊嚴廣大乃爾此十善行以戒莊嚴以自具願得諸佛法以忍莊嚴諸相種好成佛音聲以精進莊嚴降伏魔怨以佛道法有所超度以禪莊嚴心意所趣而以清淨以智慧莊嚴除諸枉見行慈莊嚴當以仁和不害衆生行哀莊嚴不捨黎庶行喜莊嚴無懈厭心行護莊嚴得無所著斷諸疑結行恩莊嚴勸化群萌行意止莊嚴止身諸痛痒心法具足行意斷莊嚴斷諸惡法具足善德神足莊嚴神足輕舉五根莊嚴堅固其行以上精進而無放逸以心修治除諸塵勞五

力莊嚴以質直心降化衆怨。覺意莊嚴曉了諸法如本所由。八路莊嚴懷來正慧寂然莊嚴滅除一切諸垢塵勞。以觀莊嚴觀諸法本審諦悉無善權莊嚴有數無數有爲無爲具足安隱。佛語龍王取要言之十善之德具足十力四無所畏成諸佛法以具足之故於是十善之德廣普莊嚴常當精進譬如郡國縣邑村落丘聚百穀藥草樹木華果種殖刈穫皆因地立十善之德天上人間皆依因之若學不學及得果證住緣覺道菩薩道行諸佛道法皆由從之於是海龍王白世尊曰何謂入法門菩薩所行入法門者除於宿世陰蓋之罪已除陰蓋得至超異佛語龍王菩薩有一法除諸罪蓋何等一立於擁護不捨所說悔過首罪復有二法除諸罪蓋何等二常觀淨法不造現在復有三法除諸罪蓋何等三入因緣

慧具足悅心。依本淨法了知本無。復有四法除諸罪蓋。何等四。曉了於空。不住無想趣於無願。慧無所造。復有五法除諸罪蓋。何等五。無我無人無壽無命無識。復有六法除諸罪蓋。何等六。歡喜篤信。而無狐疑。往返進止。觀察審諦。所作至誠。不失正信。是爲六法。除諸罪蓋。龍王白佛。何謂菩薩得至超異。世尊曰。菩薩有十事得至超異。何等十。常念歡悅。心性清淨。善權方便。堅強精進。觀察人物。行無極哀。修德無厭。博聞不倦。奉無放逸。念於道場。令得佛慧。不捨道心。是爲十事。菩薩所行得至超異。

燕居阿須倫受決品第十二

於是燕居無善神白世尊曰何謂菩薩超諸德上佛告無善神菩薩有八法超諸德上何等爲八菩薩於是離於貢高爲一切人下屈謙敬受教恭順言行相副謙順尊長一切德行諸法爲本所行堅強超諸善德樂於微妙若干種施寧失身命不求人便見有危懼施以無畏來歸命者不以捨棄求於一切福慧之業不以厭足是爲八法無善神又問佛言菩薩有幾法行得身長大面部弘滿眷屬繁熾意廣無極佛告燕居無善神菩薩有四事得身長大何等爲四不說他人所作貪嫉作佛形像根相具足和合離別勸令志於無上正真之道向於衆生無傷害貌是爲四事得身長大菩薩有四事面部弘滿何等四若干瓔珞而用布施一切所愛施而不惜常以慈眼觀於如來見人端正不生嫉妬是爲四事得面色

弘滿菩薩有四事得眷屬繁熾。何等四。離於兩舌未曾破壞他人眷屬。見他友黨代其歡喜不捨道心。并化他人令發道意。是爲四。菩薩有四事意廣無極。何等爲四。其心清淨而無諛詔除重愛欲。所在中間而無厭疲。志於微妙深入要法。一切諸法本末皆空。是爲四菩薩意廣無極。於是燕居無善神。與三萬二千眷屬。各各以若干種八千天華。散世尊上以偈讚曰。

其有於十方人種不可量須臾一時頃則供養世尊
假使十方人一切供養德在於百千劫等心給足人
不能及慈心愍傷之福行寂然極如應供養安能報
是爲諸十方供養之奉事發心無與等正諦住如應
於是吾自由立志無諛詔已覺了本無自致得佛道

人中尊見愍 三界無諛詣 十力證明我 解我心性行
柔軟無怯弱 以離諸恐懼 布施調禁勝 持戒及忍辱
精進于定意 爲應住智慧 順從慈愍哀 常奉至誠行
加哀不爲我 勝不受善決 人尊我便當 自別受佛決
吾悉不狐疑 謂不成自由 吾了了究竟 志淨在于道
人中尊時笑 月英尋問曰 今何故欣笑 唯聖解說之
化度時告曰 月英具聽之 吾所以示現 奮出大光明
時燕居廣普 志願尊大道 三萬二千人 諸所從眷屬
於百千劫中 常行菩薩道 一切志同等 當得聖佛道
當供養諸佛 等如恒邊沙 所開化人民 其數復過此
其劫曰歡喜 又号淨復淨 得佛離寂塵 覺了至無憂

此燕居廣普當逮爲法王超出精進力號曰帝幡幢
其世界名曰欣樂仁莊嚴衣食豐平賤譬如兜術天
其十力壽命七十億萬歲滿六十那術比丘比丘尼
諸菩薩之衆有八百那術堅住於總持所聞悉解了
彼於歡喜劫又号淨復淨皆以如是比當成尊佛道
開化百千人悉使住佛道具觀是德勝菩薩之道心
燕居無善神彼聞佛授決三千萬大衆善哉總要德
三千界震動則時雨天華悉發菩薩心心意之所持

於是無焚龍王白佛言。一切諸法皆無所住亦無有人。何有受決者。誰當成至無上正真道爲最正覺乎。佛言如是。如仁所言。一切諸法皆無所住。亦無有人。一切諸法亦復如是。凡夫愚人處於顛倒。住吾我人無人起人想。菩薩發大哀爲除顛倒。去吾我人被覺德鎧。此正士等曉了諸法無吾我人。開化誘立吾我人命屬仁所云誰受決者。諸仁等解人空無我。則爲受決。一切法等觀諸法寂則爲受決。諸佛國等而無所取。心淨無垢則爲受決。慧觀諸佛等諸佛道不壞法界。則爲受決。於諸魔衆等一切魔。於塵無塵了心本已。則爲受決。無名無相無應不應。無念不念不受不捨。則爲受決。佛語龍王。其心意識無所住立。則爲受決。諸法如是以無因緣

諸法本諦。覺了諸法平等無異。則成無上正真之道。究竟求本無有受決及成佛道。若受決者。若受決已。所以者何。諸法無形本末悉斷。皆無有主。一切諸法從因緣轉。諸法如空。無從生相故。諸法無從生相。無所至相故。諸法無所從來。計本空故。諸法無所至未發起故。諸法無所住。不可得處故。諸法悉空。用無身故。諸法無著。用無猗故。諸法無所猗。不可動故。諸法不可動。無處所故。諸法皆愚。用自然故。諸法自然。無言教故。諸法無言教。無色像故。諸法無色像。用無念故。諸法無念。無因緣故。諸法無因緣。無所行故。諸法無所行。用寂然故。諸法寂然。無受陰故。諸法無受陰。本淨空故。諸法脫相。用無二故。諸法無二。用本一故。諸法本一。離若干故。諸法等無差特。用等覺故。佛語龍王。解諸法等無受決者。不成等覺。且

觀于是如來堅固興無極哀及諸菩薩勸樂之力諸法如是以無
央數爲人解說合會有數於諸法觀無解脫人法亦不度人如法
者人亦如也道亦如也佛亦如也決亦如也諸法亦如也故曰如
來了於本無住本無故而不可動故曰本無本無像本無壞解了
本無故曰如來以如來故等住本無諸法如是等如本無住是爲
如來等住之地其有菩薩聞是說者不恐不怖不畏不難以是如
來等住之地爲人解說佛說是時三千菩薩皆得法忍阿耨達龍
王歡喜踊躍以白珠瓔珞價當是世而覆佛上

女寶錦受決品第十四

爾時海龍王有女。号名寶錦離垢錦。端正姝好容顏英艷。與萬龍夫人俱各以右手執珠瓔珞。一心視佛目未曾瞬。禮佛而立。時寶錦女及萬夫人以珠瓔珞奉上世尊。同音歎曰。今日吾等一類平心皆發無上正真道意。吾等來世得爲如來至真等正覺。當說經法將護衆僧。如今如來於時賢者大迦葉謂女及諸夫人。無上正覺甚難可獲。不可以女身得成佛道。寶錦女謂大迦葉。心志本淨行菩薩者得佛不難。彼發道心成佛如觀手掌。適以能發諸通慧心。則便攝取一切佛法。女謂迦葉。又如所云。不可以女身得成佛道。男子之身亦不可得。所以者何。其道心者無男無女。如佛所言。計於目者無男無女。耳鼻口身心亦復如是。無男無女。所以者何。唯仁者眼空故。計於空者無男無女。耳鼻口身心俱空。如是虛空。

及寂無男無女。若能解了分別眼本。則名曰道。耳鼻口身心亦復如是。計於道者無男無女法。是故迦葉又如諸法皆在自然。道亦自然。吾亦自然。迦葉問女汝是道耶。其女答曰。尊者耆年謂我是非道乎。迦葉答曰。吾非佛道是聲聞耳。女又問曰。誰開化仁。答曰如來。女曰。假令如來不成正覺。寧能開化於耆年不。答曰。不也是故仁者當知。在彼則爲以道無不覺道。迦葉問女。逆爲道乎。答曰唯然。迦葉逆則道也。所以者何。以別本淨可覺了。道者則無有逆解。逆本淨則名曰道。空者本無分別。諸逆則名曰道。假使諸法有合有散。則非道也。等一切法順如應者。乃爲道耳。迦葉問女。誰以如此辯才相施。女答曰。尊者迦葉施我辯才。設使仁者不問於我。何因發辯。譬如迦葉無有呼者。何緣響應。假使無問菩薩義者。無

因發辯。迦葉問女。汝爲供養幾何佛乎。女答曰。如仁者所斷塵勞。迦葉答女曰。吾不斷塵勞。女又問仁者。俗有塵勞穢耶。迦葉答曰。吾無塵勞亦不斷矣。女又問曰。安置諸塵勞。答曰。不起不滅亦無所置。所解如此如本無也。又問。本無寧可知耶。答曰。不也。又問。何故仁言。其慧如道如所知了明無爲知如此。如解本無。是故名曰慧。與凡夫等。又問女。汝所辯者斷一切言。答曰。吾無所斷亦無有言。所以者何。法界無所斷。一切所說皆應法界。迦葉又問女。汝等我於凡夫法寧不有疑乎。女答曰。假使立仁凡夫慧法。而各異者。吾當有疑。吾謂仁者凡夫無異。以故無疑。諸法皆等無若干故。是謂平等。如虛空是謂平等。又問女。汝於凡夫等聖賢耶。答曰。吾不凡夫亦非聖賢。所以者何。假使吾等身與凡夫等不行菩薩設使

賢聖等則斷佛法。又問女。設汝不與凡夫等亦不與聖賢等。寧與佛等乎。女答曰。不也。所以者何。吾身本於佛法等。又問女曰。假使汝於佛法等者。寧逮佛法乎。女答曰。仁者耆年。寧信佛法有去來今現在緣耶。有方面乎。有所處青黃赤白黑不。答女曰。諸佛之法無有形貌。女答曰。假令諸佛法無有形貌。云何從我求乎。迦葉問女。佛法當於何求。答曰。當於六十二見中求。又問六十二見當於何求。答曰。當於如來解脫中求。又問。如來解脫者當於何求。答曰。當於五逆中求。又問。五逆當於何求。答曰。當於度知見求。又問。此言何謂。女答曰。無縛無脫無取無捨。此爲本淨。是爲諸法之深教言。非若干言。又問女。是之言教不違如來言乎。女答曰。是真諦言。不爲違失如來之教。所以者何。如如來之道而無所得。亦不可持。

亦無言說。一切所言皆音聲耳。曉了道本亦無音聲。唯仁者解道寂然無跡。以名跡自愛跡。迦葉又問。假使道無跡。如是比相云何成最正覺。答曰。亦不從身亦不從意得最正覺。所以者何。身心自然乃成道耳。其自然者都無所覺。吾則是道。不以爲道成最正覺。迦葉問女汝設是道。何不轉法輪。女答曰。我轉法輪耳。迦葉問曰。所轉法輪爲何等類。女答曰。無動之輪。遠離一切諸所猗住。其法輪者謂法界住故。本無輪者順本無故。無斷輪者如本淨住故。無著輪者覺了一切諸法。無所著故。無二輪者等於一切法故。無若干輪忍一行故。無言法輪者化諸音聲皆無所想入一味故。清淨輪者一切無塵故。斷諸不調輪者不得有常無常故。無亂輪者善觀報應故。至誠輪者無起無滅故。空無輪者無相無願故。唯迦葉。

輪已如是何所轉者。大迦葉曰。如女之辯才不久當成無上正真道最正覺。女答曰。假令迦葉成最正覺時。吾亦當成最正覺。迦葉答曰。吾終不得成最正覺。女答曰。如是了法身者。道住無所住。無能得致成最正覺。女說是語時。五百菩薩逮得法忍。佛時讚曰。善哉善哉。快說此法。爾時衆會中天龍鬼神無善神香音神心自念言。是寶錦女何時當成無上正真道最正覺。佛知諸天龍神香音神心之所念。告諸比丘。此寶錦女三百不可計劫後。當得作佛号。曰普世如來至真等正覺。世界曰光明。劫曰清淨。其光明世界如來光常當大明。菩薩九十二億佛壽十小劫。於是萬龍后白佛言。普世如來得爲佛時。吾等願生彼國。佛即記之。當生其國。

天帝釋品第十五

於是天帝釋白世尊曰。此忉利天常懷恐懼。難無善神。天與無善神共戰鬪時。展轉共諍懷其怨結各有瞋毒。唯願世尊慈愍衆生諸無善神皆悉來會。此諸忉利天悉令共和。佛告燕居無善神。誑詐超度離垢錦無善神言。諸仁者。其仁慈心諸佛所歎。人能行慈現世後世具足利義。其命甚短當就後世。合會有離國土豪貴皆歸無常汝等之身不免此患。當觀後世和順同心無得懷瞋。將護罪福因緣之對。於是世尊爲說辛酸悲哀之言。使無善神及忉利天悉共和解各自說言。吾從今始當爲親友順于等行。各各當懷悲心愍哀無瞋恚意。佛言。善哉善哉。諸仁者。是則第一供養如來。

用行慈故說是語時所教造福共和不諍謂慈心三昧有四事尊敬如來何等四不違犯戒身口意慈不斷三寶志於佛道如所聞法爲人講說是爲四事尊敬如來爲供養也於是會中二萬三千天無善神聞說此言皆發無上正真道意

佛說海龍王經卷第三

佛說海龍王經卷第四

西晉月氏三藏竺法護譯

金翅鳥品第十六

爾時有龍王。一名喻氣。二名大喻氣。三名熊羆。四名無量色。而白世尊曰。於此海中無數種龍。若干種行因緣之報來生於是。或有大種或有小種。或有羸劣獨見輕侮。有四種金翅鳥常食斯龍及龍妻子。恐怖海中諸龍種類。願佛擁護令海諸龍常得安隱不懷恐怖。於是世尊脫身皂衣告海龍王汝當取是如來皂衣分與諸龍王皆令周遍。所以者何其在大海中有值一縷者。金翅鳥王不能犯觸。所以者何持禁戒者所願必得。爾時諸大龍王皆懷驚懼。

各心念言。是佛皂衣甚爲少小。安得周遍大海諸龍。時佛即知諸龍王心所懷疑恐。告海龍王。假使三千大千世界所有人民。各各共分如來皂衣。終不減盡。其欲取衣。譬如虛空隨其所欲。則自然生。佛所建立不可思議巍巍之德。其如斯矣。時海龍王即取白衣。而自分作無央數百千段。各各部分分與龍王。龍王之宮隨其所之廣狹大小。自然給與。其衣如故。終不知盡。於時海龍王告諸龍王。當敬此衣。如敬世尊。如敬塔寺。所以者何。今此衣者。如來所服。以是之故。如敬塔寺也。假使一切供養如來。有奉此衣等無差特。於是世尊告海龍王。如是如是。如仁所言。其奉此衣。則供養如來。且觀諸龍及龍妻息。各各所分如來衣。不對曰。唯然已見佛言。我皆授決。即脫龍身。於是賢劫除。志大乘。其餘諸龍。皆得無著。當般

泥洹。如是龍王。如來在世。一切衆祐發一善心。緣當致佛。未曾有失。爾時海中諸龍及龍妻息。欣然大悅。自投佛前同音說言。如來所語終無有二。至誠不虛。授我等決至無爲度。吾等今日住於大海。歸命佛法及諸聖衆。奉受禁戒。恭順如來。反復之義。如來現在數數往造。見佛稽首聽采法義。般泥洹後供養舍利。一切衆具而以奉事世尊舍利。於是四金翅鳥王聞佛所建立惶懼。速疾往詣佛所。前稽首足。何故世尊。奪吾等食。佛言。都有四食。坐趣三處。何等四。一曰網獵禽獸殘害群畜。殺生枉命。以爲飲食。是趣惡處。二曰執帶兵杖刀予斫刺逼迫格射。劫奪他財。以用飲食。是趣惡處。三曰慳貪諛詔憤亂犯禁。邪見巧欺。而以得食。是趣惡處。四曰非師稱師。非世尊稱世尊。墮邪稱正。非寂志稱寂志。非清淨稱清淨。

非梵行自稱梵行。自稱詐求而以得食。是爲四食。坐趣地獄餓鬼畜生三惡之處。吾所說法除此四食。不當以此養身害衆生命。所以者何。一切衆生各自愛命無自憎者。以是之故。欲自護身當護他人安隱衆生。明者如是。不以危逼人。所不當作慎勿爲也。爾時四金翅鳥王各與千眷屬俱而白佛言。今日吾等自歸命佛及法衆僧。自首悔過前所犯殃奉持禁戒。從今日始常以無畏施一切龍擁護正法至佛法住。將順道法到于滅盡不違佛教。佛告四金翅鳥王汝等之身。金仁佛時爲四比丘。名曰欣樂大欣樂上勝上友。是四比丘違犯戒法貪於供養。志迷醉惑隨親友種逐於豪貴。意亂吾我墮於邪見。輕諸比丘逼迫惱之。不護身口意作惡衆多。供養金仁佛亦不可計。以是之故不墮地獄。墮此禽獸前後殺生。

不可稱計。多所恐怖用不自護。世尊應時即如其像現其神足。令四金翅鳥識念宿命所可供養金仁佛及諸弟子。彼時所作罪福普悉念之。目覩悉見前世所作白世尊曰。其心剛鞞難可調伏。坐心貪嫉多所危害。違金仁尊教我等今始寧沒身命不敢犯惡佛爲說經授其決言彌勒佛時在第一會皆當得度。

舍利品第十七

爾時海龍王子及一切龍白佛言。未曾有世尊。如來所說普安一切。授諸龍決開化眷屬皆發道意。又以加恩乞施皂衣。使諸龍分各以供養稽首奉事。緣是得護因發道意。慈愍衆生遵四等心慈

悲喜護興隆四恩惠施仁愛利人等利一切救濟合聚由此行德
沙不雨身離於衆患又寂意時不失天身變爲蛇蚖臨食意後不
遭蝦蟇金翅鳥王不取食之佛化四鳥皆識宿命金仁佛時爲四
比丘坐行兇暴不順正法逼迫同學故墮金翅鳥自首悔過改心
易行發大道意行四等心不害群黎以得善護吾等永安不復見
食志不懷懼長夜無難皆蒙佛恩今如來受龍王請所演廣覆譬
如虛空無所不蓋于今世尊還閻浮利海中諸龍無所依仰唯加
大哀佛滅度時在此大海留全舍利一切衆類皆得供養華香伎
樂被服幢幡轉加功德速脫龍身疾得無上正真之道續見救濟
惟佛垂恩威德兼加所願得果佛言善哉從爾所志時須菩提謂
諸龍子諸仁者等勿建此心則爲妨廢一切之德所以者何佛泥

洹後舍利分布八方。上下天龍鬼神一切人民蚊行喘息人物之類皆當供養華香伎樂稽首自歸變化現光見者歡喜知佛威神巍巍無極緣是信之皆發無上正真道意或成緣覺或得聲聞或生天上還得人身與法相值世世得度如是之計普蒙獲濟今者卿等各自求願使佛世尊在於大海而取滅度供全舍利獨欲奉侍一切衆生何緣得度永爲窮厄無一救護以故吾言勿發此心令佛世尊海中滅度獨奉全舍利而供養乎諸龍答曰唯須菩提勿宣斯言無以己身限礙之智以限如來無極之慧如來功德聖道自在無不變現無遠無近無彼無此普遊十方其若虛空發意之頃能令海中諸龍神宮三千大千世界州城郡國縣邑丘聚人中曠野天上帝間各各化現佛全舍利一切供養於佛身體不增

不減分身十方無數佛土亦無所分普現一切不去不來譬如日影現於水中佛亦不生亦不滅度云何欲限如來慧乎欲限如來爲限虛空時須菩提聞諸龍子歎如來德無窮無極不可譬喻默而無言海中諸龍虛空諸天及諸鬼神踊躍歡喜皆發無上正真道意時佛歎嗟諸龍子曰善哉善哉仁等鑒明誠如所云無有異也佛道高妙無邊無際無方無圓無廣無狹無遠無近譬如虛空不可爲喻

法供養品第十八

於是世尊告海龍王吾於大海所當教化皆以周畢欲還精舍即

從坐起與大眾俱尋從寶階出于大海以無極莊嚴廣普威神住於海邊爾時大海神名曰光耀則以此偈而讚歎曰

身相三十二 天人所恭敬 無善神奉宗 稽首人中上
光如百葉華 猶若月盛明 清淨德超異 稽首施安隱
顏容殊妙好 百福功德相 德慧度無極 稽首於導師
施與調順上 積於清淨戒 忍辱力最勝 稽首世之上
過於精進力 禪定思清淨 智慧如虛空 稽首以自歸
行慈以等心 修哀攝衆生 喜心導御衆 常護度彼岸
妙音如哀鸞 所說喻梵聲 其響甚柔軟 願以稽首禮
降伏於魔怨 其力無等倫 遵修願道法 三處所奉持
淨除於三垢 講說三脫門 其名聞三千 是故稽首禮

善願常至誠 超度諸法上 尊勝諸國王 常施惠大財
以離諛詔塵 心堅如金剛 威神甚巍巍 光顏大殊妙
心堅如金剛 爾如須彌山 常寂度無極 故稽首禮
爲人說空義 開演如甘露 意至猶若地 是以稽首禮
開演如甘露 無趣斷所趣 漢然心平等
聞天上人間 名稱無有比 天人人所敬 願以自歸命
所作如所言 爲人說本行 德普不可量
度於老病死 爲賢衆所奉 所興爲人講 願稽首最勝
分別罪福應 淨除邪見冥 演說解脫句
以經寶布施 究暢于法樂 爲現正道行
我嗟歎導師 於德度無極 稽首善調御
所以咨嗟福 願後如世尊 归命於最勝

於是海神光耀說是偈讚佛已顯揚大海如來出海海無威神願佛垂恩遺以法教使此海中蒙其莊校而獲度脫佛告海神有十法行得至莊校何等爲十護於諸根十善清淨志于慈心不害衆生意立大哀發無上正真道一切布施以若干行莊嚴其願以大精進具足善法心常寂然不違本德好樂經法智慧清淨以愍哀行開化衆生立於正德入乎殊異以致欣悅逮得佛意導以佛教是爲十法致乎莊嚴時大海神光耀與二萬天神發無上正真道意俱共歎曰今以莊嚴於是大海所以者何若發道意則爲莊嚴三千世界何況海乎我等以發諸通慧心一切莊嚴之功德也我在於海如來現在若滅度後擁護佛法令其宣布如來入城現衆莊嚴蒙以法恩化作講堂佛告光耀海神汝前後供養萬佛普立

大殿。又護正法。次當供養賢劫。興佛將導正法。竟賢劫已。當生無怒佛國妙樂世界。轉女人身得爲男子。無怒如來當授汝決爲無上正真道。時大海神光耀。聞佛授決歡喜踊躍。則取珠瓔價喻海寶。用散佛上。即而頌曰。

佛以聖諦音 能仁授吾決 我不懷猶豫 後當成佛不可令三千界 他所有劈裂 亦令月墮地 佛所說不妄觀慈志境界 心淨修精進 今察我莊嚴 恭敬慧法義覩安住所行 以慧決狐疑 了心如野馬 所說審至誠施安除衆苦 歿命救恐畏 所療益無難 稽首最正覺度脫諸惡趣 歸命光照世 導師明無上 稽首佛說道其有聞佛聲 諸天人快利 佛法清淨行 志在於佛道

不得歸惡趣 便棄于八難 生天在人間 後得寂然跡

於是海龍王子名曰受現白佛言無央數天龍神香音神無善神鳳凰神山神甜柔神供養佛我身亦當少少供養如來正覺假使世尊愍傷聽者化作大殿譬如忉利最上選宮佛及弟子悉處其上送化靈鷲山世尊曰如仁者願宜知是時受現龍子自以神力承佛聖旨化大嚴殿如忉利宮佛及衆會皆處其上在虛空中與八萬四千龍王諸后鼓諸琴瑟而雨衆華及一切香送佛世尊詣靈鷲山海龍王子與中宮俱在世尊前自投歸命願周不及所以者何所興供養當如其寶佛爲一切無上福田世尊大寶正使三千大千世界滿中羅漢皆共供養於百千劫不如奉侍如來世尊如是乃應供養又世尊何謂菩薩供養如來佛言且聽菩薩所行

供養如來。其心清淨除於瑕穢而無諛詭。本性自然不著一切諸善之本。無加害心等。光衆生除妖邪心。所行鮮潔言行相應。不侵欺世。賢聖智足威儀至德。一切平平而不違捨。賢聖大願樂於空閑。捨衆憒鬧自調其心。聞法靜思解知本諦。無我無人無壽無命。入於空無入普達寂。觀空無想無願。至三脫法。如是像法調諸邪見。棄有常無常不起不滅。逮得法忍本淨無人。無身口心志行因緣。是則應法供養如來。身口心行則不供養。無所造行不進不退。淨三道場等於三世。除去三垢不著三界。入三脫門得三達智。是則名曰供養如來。時海龍王問世尊曰。其有人以華香雜香繡香繒蓋幢幡伎樂衣被飲食牀臥病瘦醫藥供養如來。寧應供養不。佛言。龍王。隨其所種各得其類。此之供養不爲究竟。離於垢塵殖。

于德本逮至賢聖心之解脫不爲無德不至無上菩薩有四事應供養如來何等四不捨道心殖諸德本心立大哀合集慧品建大精進嚴淨佛土入深妙法心得法忍是爲四尊敬如來爲供養也爾時王舍城中梵志長者及無央數人民尊者大臣上至摩竭國王阿闍世聞佛在大海龍王宮就請來還靈鷲山時七萬二千人皆詣佛所王阿闍世與官屬三萬二千出王舍城詣靈鷲山稽首佛足遠佛三匝却住一面前白佛言佛入大海水何所至佛言大王其有比丘威光定意心正受者普見滿火其水安在王對曰三昧自在之所致也天中天志心所爲也佛言王寧得聲聞所興三昧自在已耶心之所爲乎如來常定等一切法曉了坐起而得自在於法爲尊心無所礙佛入大海其處水類續見如故其陸地人

覩乎大海。其水枯涸。但見衆寶而莊嚴之。譬如第六他化自在諸天宮殿所莊嚴也。佛光普照諸龍宮殿香音神宮無善神宮。其大海中含血之類。皆行慈心仁意相向。無懷害者。阿闍世王白佛。其海龍王久如發無上正真道意。奉事幾佛。何時當逮最正覺。所號爲何。佛告王曰。乃往久遠無央數劫不可思議。彼時有佛。号光淨照耀如來至真等正覺。明行成爲善逝。世間解無上士道法御天人師号佛世尊。乃在東方世界。曰善淨現劫。名可意寂。其善淨現世界平正而悉莊嚴。假使一切嗟歎其德不能究竟。時有轉輪聖王。号曰護天。常供養光淨照耀如來。四百二十萬歲。一切施安竟。此之數寐於夢中。自然瑞應聞此偈曰。

王以供養大聖人。甚多無量難思議。常興慈哀於衆生。

當發最上菩薩心 是供養尊妙第一 此則奉敬諸如來

其有能發菩薩志 則爲度世威神德

佛告阿闍世王。其護天轉輪聖王。夢聞此已。寤自驚怪。吾供養佛四百二十萬歲。佛說經法章句各異。初未曾聞如此偈經。是佛說邪魔所云乎。即疏偈文而諷誦之。時光淨照耀如來行遊諸國。聖王即與八萬四千王及八萬四千后國中臣民。其諸往者各八萬四千。俱往追佛欲決斯疑。即逮見佛稽首足下。敬問無量。即白佛言。吾供養佛四百二十萬歲。佛說經法若干種義。我昨夜夢。夢中見佛說此二偈。寤甚驚怪。未從如來聞此偈教。不審佛所歎乎。魔所說耶。今故遠來欲決此疑。唯願世尊分別說之。佛告護天。是吾所讚非魔之所云。王又白佛言。我奉事世尊若干億歲。供養衣食。

無所乏少爲我說經章句各異爾時何故不歎此義佛即以偈答

王曰

人心羸劣未有識 初習福事未見深 不可爲說微妙法
心中驚疑或作却 以解罪福信佛法 心堅意固不迴動
乃可爲說菩薩事 爾乃解至無極慧

時王及群臣后民心中大悅皆發無上正真道意尋立不退轉地則以此偈而讚世尊曰

不以貪諸色 亦不猗音聲 香薰衆細滑 不以此得佛
離懈怠怯弱 避貪嫉犯法 除瞋恚憤亂 乃得成正覺
捨身諸所安 代衆生受惱 精進常樂法 如是乃得佛
我今志大道 佛與天證我 唯導師造行 令所言無異

夢中聞道心 適聞志大乘 所作慧無疑 得至佛法王

佛告阿闍世王欲知爾時轉輪聖王護天者不今海龍王是彼時初發無上正真道意又王所問何時成佛王具當聽過二百無央數劫當成爲佛号無垢淨無量德超所有王如來至真等正覺世界曰法音聲劫曰首華其法音聲世界衆寶合成若干種色地平如掌其地柔軟如天綻綻有萬億安明山廣普難量安隱豐熟五穀平賤天人充滿衣服飲食如第六天人所居法音聲世界諸樹根葉莖節華實皆以七寶悉出無數若干百千道法音聲其界人民猶若諸天所語變化柔軟之聲皆承法音寂然澹泊及佛法衆智度無極四恩之教善權方便滅定離欲空無想不願無爲無數以故其界名法音聲其有天人在彼土者樂法歡喜皆當入大聖

分別諸慧審諦究竟發無上正真道意。其佛欲說經時。身放大光普照佛界。其光明中則出億佛說講法聲。時諸天人見光聞法欣然大悅。往詣如來自歸供養。則無央數以神足力飛行虛空化寶蓮華而坐其上。如來應時亦在虛空坐師子座。爲諸菩薩講說經道。時諸十方無央數百千諸菩薩者。皆當來會聽受經法。其國人民皆樂經法。亦無諸魔有所娆害。亦無衆邪異道。亦無橫死。其佛壽十二劫。諸菩薩行超過於空。其國如是莊嚴無量。說法無限菩薩無數。

空淨品第十九

王阿闍世前白佛言。唯然世尊。常於諸法有大愍哀。諸法詭詐因惑起想。隨其所欲展轉相惑。菩薩之行不可計量。彼爲菩薩當修道行。至彼佛土具足嚴淨。諸菩薩行皆當追學攝取佛土。如海龍王國土嚴淨。佛言。如是如是。大王。一切諸法皆從念興。隨其所作各各悉成。諸法無住亦無有處。爾時阿闍世王謂海龍王。快哉龍王。爲得善利。乃令如來授仁之決。當成佛時。國土清嚴不可思議。龍王答曰。法無有決。所以者何。諸法皆靜因種陰入。假名曰人。其受決者無陰種入。以有名色假名爲人。其受決者無名無色。因緣報應見思想念。假名曰人。其受決者無有報應無見無思無想無念。假使菩薩等行德本。彼之德本亦無決矣。諸法相空虛空無決。

一切諸法無想無願無爲無數不授無想無願無爲無數之決也。龍王復謂王阿闍世。諸佛大哀不可思議。諸經無名無有思想而說名想。諸佛世尊無名相識。而隨習俗因而示現有授決也。彼亦無法受決。亦無內外當受決者。阿闍世又問龍王言。以得法忍逮平等行。菩薩如是乃得決乎。海龍王曰。其忍悉空想不可盡。究竟曉了。至于本際。無盡之際。平等之際。無我之際。審諦之際。至于究竟無成就際。其際以空至于脫際。媱怒癡際有了是際。則無所猗無所猗者。設於音聲無合會。無合會者不著無脫。無脫無行。行無所行亦無不行。亦無所憂。已無所憂。於斯菩薩則覩一切諸所作行所見無見。假使無所見不作審諦而已平等入已所住。已平等度。不殘不禮不卒不暴。以等諸法然後得忍。彼所謂忍。

及所授決。若受決已及受決者。是一切法皆平等法乎。諸法界究竟無法界。無不以決了亦無所成。觀此法已察其義理。諸法無能計者。譬如虛空不可計數以度諸數。諸法如是。海龍王說是語時。二萬菩薩得不起法忍。百比丘漏盡意解。爾時王阿闍世白佛。至未曾有世尊。龍王之辯。佛言。未足爲怪。不以爲難。新發意者聞是。不恐不難不畏。是乃爲難。所以者何。諸佛世尊本之道法。如是難及。少有信者。天上世間人不能受。不入不信而不喜樂。以故當知其有聞是深經法者。不以恐畏此乃爲難。前世供養無央數佛。安以爲難。譬如有人虛空無形而現形像。是爲難不。對曰。甚難。天中天佛言。其聞此經深奧之義。一切信樂皆知無我無人無壽無命。其有信者。甫當信者。此等則是如來順明平夷之類。親友善師也。

則能堪任信除垢塵爲一切人講說經法能指道場以慈降伏百
千億魔及餘官屬爲於諸法而得自在在其心清淨諸通之慧近在
目前發意之頃成智慧明逮最正覺勸誅衆生知一切心群萌諸
根而轉無上大法輪也療一切病開化異道破壞怨敵吹大法蠡
於是海龍王所願皆獲不失本志聞所受決欣然大悅善心生
焉踊在虛空以偈讚佛

如虛空本清淨 無色無受無數 安住說法如是
若虛空普自然 名不有而不無 造因緣及報應
安住講調不諍 無人命無壽識 一切法甚清淨
吾我清悉平等 吾我靜法等靜 解是者則受決
察法界本清淨 人界靜亦如是 如衆生界靜者

佛法靜亦復然
設佛土清淨者
以計數不得名
群萌類志所念
諸法爾空無心
終始瑕無行者
虛空本無我際
去來今現在際
究法界佛種性
無言聲真諦法
自然悅如捉空
若佛法清淨者
諸慧靜無差特
由想數名本空
無見無色無成
或有作則無作
名泥洹無寂然
選諸際得等原
知衆生本審門
順明智此諸際
不起滅最勝幢
是諸聖寂寞地
假如此樂聖法
諸佛土靜亦等
諸法淨因數號
其諸名數無礙
如無成心意識
有緣罪無受者
入本際無礙原
於慧等無際門
空無想願本靜

十方佛所說法 當來佛所宣揚 一切等未來聲
因音現入無聲 聲空自然如響 諸法空猶虛念
無法非法教化 誠本無可不得 一切法無主名
若干想念非明 人名靜不可得 諸法本靜如是

囑累受持品第二十

於是世尊告諸大士言諸正士汝等當持此如來說無上正真道使得久存誰能堪任受持誦說如是像經即時二萬菩薩萬天子起住佛前同音白世尊曰吾等當受如是像經當令流布普周遠近佛又問言汝等云何而將御法持斯如來無上正真道乎彼有

菩薩名曰慧英幢。前白佛言。唯然世尊。隱省諸法都無所持。寧能
髮鬚持佛道乎。世尊答曰。族姓子。如斯則應持佛道。等見菩薩白
佛言。揆察佛道等乎五逆。寧少髮鬚持佛道乎。世尊曰。族姓子。是
故仁者則應持如來佛大道也。無見菩薩曰。唯然世尊。我不見凡
夫法。亦不見學。不學法。不見緣覺及菩薩法。亦不見佛法。我有持
如來法乎。世尊曰。族姓子。以是寂故應持如來佛大道也。諸法無
所願。菩薩曰。唯世尊。我永不知一切諸法當所持者。寧能爲持如
來法乎。世尊曰。族姓子。以是寂故應持如來佛大道也。不徇菩薩
曰。唯世尊。我自不行。亦不遺心。亦不發意。我寧爲持如來法乎。世
尊曰。族姓子。以是寂故應持如來佛大道也。無得菩薩曰。唯世尊。
其不說法及非法。不演法聲除諸法想。如是行者爲護一切法乎。

答曰族姓子是應寂然無在菩薩曰唯世尊其不聽受法應不應爲護正法乎答曰族姓子是應寂然虛空藏菩薩曰唯世尊其觀諸法等如虛空不見彼法有所執持爲護一切法乎答曰族姓子是應寂然度金剛作菩薩曰唯世尊不壞法界入於人界及以法界爲持正法乎答曰族姓子是應寂然度不動跡菩薩曰唯世尊其於諸法無所動轉不猗法及非法爲持正法乎答曰族姓子是應寂然嘲魔菩薩曰唯世尊其至魔界佛界則於佛界及與魔界悉以爲入諸法境界爲護正法乎答曰族姓子是應寂然無著菩薩曰唯世尊其於諸法都無所得一切毛孔皆出法聲爲護正法乎答曰族姓子是應寂然普寂菩薩曰唯世尊不護諸魔行菩薩道爲持正法乎答曰族姓子是應寂然海意菩薩曰唯世尊其

以海印等一切法修一切解味而知自然爲護法乎答曰族姓子是應自然須深天子曰唯世尊其有所生不起不生諸陰種入無心意識爲護正法乎答曰族姓子是應寂然無垢光天子曰唯世尊其見諸法無垢塵者無衆瑕穢解脱諸受爲護法乎答曰族姓子是應寂然度人天子曰唯世尊其度衆生不知萌類度無所度既有所度現周旋還不住彼此爲受法乎答曰族姓子是應寂然賢王天子曰唯然世尊其於衆生而等一切諸法已等等諸國土等諸佛道爲受正法乎答曰族姓子是應寂然自在天子曰唯世尊其於諸法而得自在普於諸法不起不滅爲受正法乎答曰族姓子是應寂然善念天子曰唯世尊我不念法亦無所得亦不有想爲受正法乎答曰族姓子是應寂然蓮華天女曰唯世尊知一

切法皆爲佛法。不成正覺無所不覺。爲受正法乎。答曰族姓女。是應寂然。麻油上天女曰。唯世尊。我不得女亦不得男。如佛法想及男女法想。亦復同等。此諸法想則爲非法。亦非無法。無二無一。亦無所至。我爲受法乎。答曰族姓女。是應寂然。寶女曰。唯世尊。我不見佛。佛道覩菩薩行爲被一切志德之鎧。不察於本末。爲受法乎。答曰族姓女。是應寂然。無垢光女曰。唯世尊。於一切法不起法想。於一切人不起人想。亦不想念人法。佛法覩諸佛法入一切法。不見本末。我爲受佛正法乎。答曰族姓女。是應寂然。建行如是爲受佛法。於是天帝釋白佛言。未曾有也。世尊。此女人等所說辯才不可思議。分別方便合若干音。文字之說講于法界。不亂諸法。諸法平等。如演說道等不差特。佛言如是。拘翼。是諸女等分別無量不

不可思議法。供養奉事不可計佛。以得法忍。又拘翼。是經卷者。号不起忍持。無所御。當爲衆會廣說其義。如來滅度後。受是法者。護持法城。則爲供養佛世尊已。天帝釋白佛。我已奉受此經本已。佛所建立。當令廣普。當爲將來諸大士故。分別說之。終不迷謬違佛之教。所以者何。如來護我授以法忍。佛當建立此之經典。令降衆魔。志行於斯。佛言拘翼。有神呪名曰遮諸妨礙。具聽。今爲汝說神呪要言。使一切魔及諸外徑。令諸官屬自然降伏。使如來法光明久立。爾時世尊說神呪曰。

無畏離畏 淨諸恐懼 施無畏 度於滅度 無所亂 淨所亂
大威神 寂滅 趣慈心 除於瑕 示現諦 無蹉錯 其

同義 吉祥義 甘露句

見於要

以導御

無所懷 行次

第 無所盡 光無生

清淨生

鮮潔光

照句 等順於等心

至無上

佛所建立戒清淨

無所犯

無所負

制魔場

降外徑

光耀法明 攝以法施

開法藏

今是神呪過去當來今現在佛所說以擁護法而順句義以此章句總執降伏一切諸魔塵勞跡也於是普首天白佛言我當受此經典之要精進諷誦當令廣普所以者何於如來法則有反復長益法律布清白典我修反覆擁護如來所賈法目時有天子名曰德超白佛言若有受此如來之法其福云何於是世尊即說頌曰
今吾所見國 佛眼覩十方 皆滿中珍寶 則以持布施
其人所獲福 計當過於彼 至心受世吼 所說之經法

合集諸譬喻 一切歎廣說 終不能究竟 總持正法德

佛說是經時。七十六那術人皆發無上正真道意。六萬菩薩得不起法忍。三千大千世界六返震動。其大光明普照世間。而雨天華。百千伎樂不鼓自鳴。諸伎樂音出是輩聲。如來之尊建立是經。降伏衆魔化諸外徑。如來以印印此經已順而不忘。爾時海龍王雨大珠瓔供養此經。周遍三千大千世界。佛告賢者阿難。以是經卷用爲囑累。受持諷誦。普令流布爲他人說。阿難對曰。唯然世尊。已受斯經。經名何等。云何奉持。佛言。是經名曰海龍王問龍總持品。又名集諸法寶淨法門品。當善奉持。佛說如是。海龍王及龍王子。諸天人民十方諸來大會菩薩。諸大聲聞釋梵四天王。賢者阿難。一切魔衆諸天龍神香音神無善神鳳凰神山神。甜柔神及世間。

人莫不歡喜作禮奉行
佛說海龍王經卷第四

佛爲娑伽羅龍王所說大乘經

佛爲娑伽羅龍王所說大乘經

西天譯經三藏朝散大夫

試鴻臚少卿傳法大師臣施護奉 詔譯

如是我聞。一時佛在大海中娑伽羅龍王宮莊嚴道場。與大比丘衆七千五百人俱。并諸得大智慧菩薩摩訶薩。自十方世界皆來集會。復有百千俱胝那由他梵王帝釋及護世等。天龍夜叉乾闥婆阿修羅讖喎拏緊那羅摩睺羅伽等亦來集會。爾時世尊見彼一切大衆來集會已。告娑伽羅龍王言。龍主。觀此世間種種行業。皆從妄起。種種心法當感種種果報。若彼不了當生種種之趣。龍主汝當觀此大海之衆。見作種種士夫色相。龍主而彼一切色相。由於一切善惡身口意業。各各之心種種變化。然此心法雖云色。

相由如幻化無可取故。龍主此之色相一切諸法本無所生亦無主宰。無復有我亦無礙故。如是種種所作之業。諸法自性皆幻化相不可思議。龍主若有菩薩知一切法無生無滅無色無相。如實知已所作所修一切善業而無修作。所有色相及蘊處界。一切生法悉無所見。彼若如實得是見已。當復觀察殊妙色相。龍主殊妙色相云何觀察。當觀如來身相。如來身者皆從百千俱胝那由他福德之所生故。又如是之相云何嚴持云何恭信。當得如是之相復得人間天上無老無死。復得十百千他化自在天身乃至大梵天身。此由心不散亂專注觀想瞻仰如來最妙之身。實知此身一切色相殊妙莊嚴皆從善業所集而得。龍主如汝住宮一切莊嚴亦福所生。至於梵王帝釋及護世等乃至天龍夜叉乾闥婆阿修

羅迦樓羅緊彙羅摩睺羅伽人非人等。所有一切莊嚴皆福所生。
龍主。又此大海之中所有衆生種種。或有廣大或復微細多住醜
陋。彼一切身皆由種種心之所化。龍主。是故說言。隨身口意業之
所得。龍主。如是之報。以業爲因。業爲主宰。汝當令諸衆生起智慧
心。所作所修隨學善業。於諸邪見不作不住。知彼邪見非爲究竟。
如是知已。一切衆生當求爲師。咸來供養。并得天上人間歸信供
養。龍主。而有一法能令衆生斷於一切惡趣之業。云何一法。所謂
觀察善法。而彼善法云何觀察。當觀自身。我於日夜行住坐臥。所
興心意無不是過。如是覺察。令四威儀中諸不善法不得發生。如
是斷盡諸不善法。當令善法而得具足。復使一切同善衆生悉皆
當得聲聞辟支及菩薩等。乃至無上正等正覺之位。龍主。云何善

法我今說之所謂十善之業是爲一切根本安住是生天上人間根本安住世間出世間殊勝善法根本安住聲聞辟支佛菩薩根本安住無上正等正覺根本安住云何爲彼根本安住所謂十善業道若能遠離殺生偷盜邪婬妄語綺語惡口兩舌乃至貪瞋邪見等若能如是遠離是爲十善業道乃是世間出世間根本安住龍主士夫補特伽羅遠離殺生獲得十種善法云何十法所謂得無畏施他一切衆生得住慈心得正行得不起一切衆生過失之念得少病樂得壽命長得種種非人而作擁護於眠睡覺寤皆悉安隱又得賢聖守護心不厭捨於睡夢中不見惡業苦惱之事自得不怖一切惡趣命終之後得生天上龍主士夫補特伽羅獲得如是十種善法行菩薩道得善心住善根成熟當得無上正等菩

提龍主士夫補特伽羅遠離偷盜獲得十依止法云何爲十所謂得大富自在得免王難得免水火賊盜冤家之難得多眷屬善順和睦得多人愛樂不相苦惱凡所言說一切諦信得無量財寶皆悉集聚得此方他方一切稱讚於一切行處無怖無畏得他稱善名讚於智慧又得色力壽命辭辯相應於親非親心無分別不生惱害命終之後得生天界龍主士夫補特伽羅遠離偷盜獲得如是十依止法以彼善根於諸佛法自能證知當得無上正等正覺龍主士夫補特伽羅遠離邪姪獲得四智善法云何爲四所謂降伏諸根離於散亂得世間一切稱讚復得無量營從龍主士夫補特伽羅遠離邪姪獲得如是四智善法以此善根當得無上正等正覺復證大丈夫陰藏隱密之相龍主士夫補特伽羅遠離妄語

獲得天上人間八種善法。云何爲八。所謂得口處清淨。常如青蓮華香。又得世間一切正見。得天上人間一切愛樂。得身口意清淨。化彼一切有情。令住三業清淨之行。得清淨已咸皆歡喜。得真實語言必誠信。得過人辯所出言辭咸有方便。於天上人間離諸過失。龍主士夫補特伽羅遠離妄語。獲得如是天上人間八種善法。而彼善根獲得口業清淨誠實正行。當得無上正等正覺。龍主士夫補特伽羅遠離綺語。當得三種一向之法。云何三種。所謂得知法者一向愛樂。得一向真實。復生智慧得一向爲人天師。天上人間一切信樂。龍主士夫補特伽羅遠離綺語。獲得如是三種一向之法。以此善根廻向菩提。得一切如來授記。當證無上正等正覺。龍主士夫補特伽羅遠離惡口。獲得八種口過清淨。而得八種善。

法云何爲八。所謂實語愛語依義語軟語離取語多人愛樂語善語有義利語。龍主士夫補特伽羅遠離惡口。獲得如是八種清淨口業。以此善根廻向菩提。當來證得無上正等正覺。復得最上清淨梵音。龍主士夫補特伽羅遠離兩舌。當得五種堅固。云何五種堅固。所謂得身堅固。當得遠離一切怖畏之難。故得眷屬堅固。不爲他人之所貪。故得信堅固。獲得信業果報故。得法堅固。獲得果證堅牢故。得善友堅固。常得愛語攝受故。龍主士夫補特伽羅遠離兩舌。獲得如是五種堅固。以彼善根廻向菩提。當證無上正等正覺。使彼一切外道魔王等咸不能破壞故。龍主士夫補特伽羅遠離貪毒。獲得八種善法云何爲八。所謂得貪心消除。得殺心不生。得嫉妬心不生。得樂生聖族心爲聖人尊重。得慈心以善業利。

益一切衆生。得身端正。得多人尊重。得生於梵世。龍主。士夫補特伽羅。遠離貪毒。獲得如是八種善法。以此善法廻向菩提心不退轉。當證無上正等正覺。龍主。士夫補特伽羅。遠離瞋毒。當得五種勝願圓滿。云何爲五。所謂修身口意不退。諸根不亂。當得一切廣大富貴圓滿。得冤家降伏。得一切廣大福德圓滿。得受人天最上供養。得一切廣大功德圓滿。於最上受用心所欲者。皆得圓滿。如爲富貴發百千最上勝願。如願圓滿。龍主。士夫補特伽羅。遠離瞋毒。獲得如是五種圓滿。以此善根廻向菩提。證得無上正等正覺。而爲三界之所尊故。龍主。士夫補特伽羅。遠離邪見。獲得十種功德之法。云何爲十。所謂得自心安善及同行善友深信因果。得不爲身命作於罪業。不久獲得賢聖之位。得不迷善法修人天行。不

墮傍生及焰魔界行於聖道得最上福得離一切邪法得離身見
得見一切罪性皆空得天上人間正行不闕龍主士夫補特伽羅
遠離邪見獲得如是十種功德以此善根廻向菩提速能證了一
切佛法當得無上正等正覺龍主復次觀於十不善法微細之行
多墮地獄餓鬼畜生之趣龍主觀彼衆生若復殺生當墮地獄畜
生焰魔等界後生人間以餘業故得二種報一者短命二者苦惱
若復偷盜當墮地獄畜生焰魔等界後生人間以餘業故得二種
報一者自居貧賤二者不得他人財寶若復邪染當墮地獄畜生
及焰魔界後生人間以餘業故得二種報一者愚癡二者妻不貞
正若復妄語當墮地獄畜生及焰魔界後生人間以餘業故得二
種報一者言不誠實二者人不信奉若復绮語當墮地獄畜生及

焰魔界後生人間以餘業故得二種報。一者言不真正。二者所言無定。若復惡口。當墮地獄畜生及焰魔界。後生人間以餘業故得二種報。一者言多鬪諍。二者人聞不重。若復兩舌。當墮地獄畜生及焰魔界。後生人間以餘業故得二種報。一者得下劣眷屬。二者感親屬分離。若復多貪。當墮地獄畜生及焰魔界。後生人間以餘業故得二種報。一者不能利益他人。二者常被他人侵害。若復多瞋。當墮地獄畜生及焰魔界。後生人間以餘業故得二種報。一者心常不喜。二者多不稱意。若復邪見。當墮地獄畜生及焰魔界。後生人間以餘業故得二種報。一者邪見。二者懈怠。龍主若有行於如是十不善法。決定獲得如是果報。復更別得無邊諸大苦蘊。龍主若復菩薩遠離殺生。修菩薩道行於布施。得大富長壽及無量

福得離一切他侵之怖。龍主若復菩薩遠離偷盜修菩薩道行於布施得大富貴及無量福而於一切心無憍慢證得深智諸佛所說無上法義。龍主若復菩薩遠離邪染修菩薩道行於布施得大富貴獲無量福感善眷屬父母妻男悉無惡見。龍主若復菩薩遠離妄語修菩薩道行於布施得大富貴獲無量福當感所有語言一切善軟凡起誠願堅固不退。龍主若復菩薩遠離绮語修菩薩道行於布施得大富貴獲無量福所言真實聞者信受凡有所說斷一切疑。龍主若復菩薩遠離惡口修菩薩道行於布施得大富貴獲無量福所言可取聞無背捨於諸衆中無有其過。龍主若復菩薩遠離兩舌修菩薩道行於布施得大富貴獲無量福於諸眷屬心住平等愛之如一無有離散。龍主若復菩薩遠離貪毒修菩

薩道行於布施得大富貴獲無量福得端正身諸根具足見者愛樂心無厭捨龍主若復菩薩遠離瞋毒修菩薩道行於布施得大富貴獲無量福得於仇讐心無所起聞佛法要能生深信龍主若復菩薩遠離邪見修菩薩道行於布施得大富貴獲無量福於三寶所而具正見常近於佛得聞妙法供養衆僧常無懈退教化衆生令發菩提之心龍主若能修此十善之業行菩薩道初以布施而爲莊嚴果報圓滿得大富貴若以持戒而爲莊嚴果報圓滿得一切佛法願滿具足若以忍辱而爲莊嚴果報圓滿得佛菩提三十二相八十種好復得梵音具足若以精進而爲莊嚴果報圓滿當得正念清淨法行具足若以智慧而爲莊嚴果報圓滿當能降伏天魔外道以諸佛法而救度之若以禪定而爲莊嚴果報圓滿當得正念清淨法行具足

當得永斷一切邪見。若以大慈而爲莊嚴。果報圓滿能令一切衆生降伏一切微細煩惱。若以大悲而爲莊嚴。果報圓滿當得一切衆生心不厭捨。若以大喜而爲莊嚴。果報圓滿當得一心而無散亂。若以大捨而爲莊嚴。果報圓滿當得微細煩惱皆悉除滅。龍主乃至以四攝法而爲莊嚴。果報圓滿當得一切衆生隨順化導。若以四念處而爲莊嚴。於身受心法悉能解了。若以四正斷而爲莊嚴。能使一切不善之法皆悉斷滅。得一切善法圓滿。若以四神足而爲莊嚴。能得身心皆獲輕利。若以五根而爲莊嚴。當得信進不退心無迷惑。了諸業因永滅煩惱。若以五力而爲莊嚴。當得不愚不癡。及得永斷貧窮過失。若以七覺支而爲莊嚴。當得覺悟一切如實之法。若以八正道而爲莊嚴。當能證得正智。若以奢摩他而

爲莊嚴當得斷於一切煩惱。若以尾鉢舍囊莊嚴當得了悟一切法之智慧。若以正道而爲莊嚴。當於有爲無爲一切方便悉能了知。龍主我今略說十善之法而有莊嚴。至於十力四智及十八不共之法乃至如來一切法分皆得圓滿。龍主乃至廣大解說此十善業道莊嚴之事。當令修學龍主譬如大地能與人界一切國城聚落乃至林樹及藥草等而爲安住。又復諸業皆有種子。種子旣有四大而成。由如種穀初生芽莖乃至成熟。皆依於地。龍主此十善業道能爲天上人間一切有情勝妙安住。能令一切有爲無爲得智果報。一切聲聞及辟支佛乃至菩薩無上正等正覺而爲安住。亦復爲一切佛法根本安住。龍主我此所說汝等一切當以正心而生信解。爾時娑伽羅龍王并在會諸菩薩摩訶薩。一切聲聞。

及天人阿修羅乾闥婆等。一切大衆聞佛所說。歡喜奉行。
佛爲娑伽羅龍王所說大乘法經。

龍王兄弟經

龍王兄弟經

聞如是。一時佛在舍衛國祇洹阿難邠低阿藍時有無央數比丘僧皆阿羅漢也。阿難邠低至佛所作禮却坐。佛言人當布施持戒忍辱精進禪定智慧。阿難邠低聞之歡喜即起白佛明日請佛及比丘僧降德到舍設麤食。佛默然。阿難邠低繞佛三匝而去。佛告比丘僧。旦日當上天投日中下會阿難邠低舍。佛如伸臂頃即住虛空中。羅漢名須檀正衣服於虛空中長跪白佛我恒上下未嘗冥如今日也。佛言有兩龍王瞋恚作變吐氣爲雲故也。復有羅漢名愛波白佛欲行止之佛言此龍大有威神汝行者必當興惡意出水沒殺天下人民摩訶目犍連復正衣服長跪虛空中問佛今

日以冥不復見須彌山帝釋宮殿下已質樹子佛言有兩龍王一名難頭二名和難大瞋恚言何等沙門欲飛過摩我頭上龍身繞須彌山七匝以頭覆其上吐氣出霧故冥目連白佛欲往訶止之佛言大善目連繞佛三匝而行釋提桓因從八萬八千玉女於後園相娛樂目連先過其所天帝迎之稽首作禮相問訊已乃到龍所兩龍見之大怒便變化出煙須臾復出火目連以佛意亦變化出烟必繞兩龍三重稍前分身入兩龍身中右目入左目出左目入右目出右耳入左耳出左耳入右耳出復入右鼻左鼻出入左鼻右鼻出飛入其口中兩龍謂目連在其腹中也目連亦復作龍身繞兩龍十四重以頭覆須彌及兩龍兩龍於下悚慄延動須彌山以尾搏扇海水百獸震怖佛遙告目連此龍今當能出水沒壞

天下汝且須止。目連言。我從佛聞知此法。我有四神足。當信持行之。我能取是兩龍及須彌山。著掌中跳過他方天下。亦能取劑磨須彌山令碎如塵。復能磨須彌山及下地。令萬民不覺之。兩龍恐懼稽首。日連復沙門身。兩龍化作人。爲目連作禮悔過。目連將至佛所。兩龍言。我迷狂惑。不知尊神。觸犯雷震。哀原其罪。便受五戒而去。阿難邠低到精舍。索佛及比丘僧。了不見一人。便長跪白佛。飯具以嚴辦。佛可自屈。佛即下到其舍飯已。阿難邠低言。我求佛不見。佛從何所來。佛言。目連與兩龍王共諍。適從天上来下。問誰勝者。佛言。目連。阿難邠低言。善哉。善哉。此龍乘戒堅強。失之毫數。罪至於龍威神尊重。目連迺臣伏之乎。我從今日始。請佛及比丘僧。宣揚目連功德。佛呪願迦羅越阿難邠低。汝前後飯食得道人。

善鬼神當擁護汝家皆令安隱阿難邠低作禮而去
龍王兄弟經

佛爲海龍王說法印經

佛爲海龍王說法印經

大唐三藏法師義淨奉 詔譯

如是我聞。一時薄伽梵。在海龍王宮。與大苾芻衆千二百五十人俱。并與衆多菩薩摩訶薩俱爾時婆竭羅龍王即從座起前禮佛足白言世尊頗有受持少法得福多不佛告海龍王有四殊勝法若有受持讀誦解了其義用功雖少獲福甚多即與讀誦八萬四千法藏功德無異云何爲四所謂念誦諸行無常一切皆苦諸法無我寂滅爲樂龍王當知是謂四殊勝法菩薩摩訶薩無盡法智早證無生速至圓寂是故汝等常應念誦爾時世尊說是四句法印經時彼諸聲聞大菩薩衆及天龍八部阿蘇羅捷達婆等聞佛所說皆大歡喜信受奉行

佛爲海龍王說法印經

佛爲海龍王說法印經

二

俱 力 迦 羅 龍 王 儀 軌

俱力迦羅龍王儀軌

金剛智三藏

爲此具最上利根人現身也。或爲繫持念行者必可現形。是爲大日如來因位三毒煩惱行相而已。

爾時大日如來金剛忿怒力士諸天等爲我行者現忿怒龍王身。畏彼之三毒煩惱永離三途輪迴苦業。此故可說我秘密呪真言曰

俱力迦羅龍王儀軌

次俱力迦羅龍王現身印真言。二手作忿怒奉舉二肩真言曰

俱力迦羅龍王儀軌

次俱迦龍王不動明王真言印。二手金剛合掌。二火二空開散。二

小指入掌中真言

帝釋天子

心中心印內縛二水二火開散心中心真言曰

帝釋天子

不動如來大日如來龍王現身根本真言

帝釋天子

誦此真言必現身往生十方淨土若拜尊容至阿耨菩提終不墮三惡趣此龍王火光三昧神通也火天者此彼四智所語故火天聖者火光三昧赫奕光明皆此火天身能可念此龍王不思議神力只有此法觀本生法變大日成不動變不動成劍之上相字返成龍王左右無名小指掌內相叉二中指直立相註以二食指

趺中指背上節以二大指小曲各柱二食指內中節來去
曩莫三滿多勃駛南俱里迦耶迦羅惹銘伽扇爾曳婆婆訶
次俱力迦羅龍王密修言印內縛二中指二大指開散印此密也

大日如來也

次俱力迦羅變身印真言

二手合掌二風二空端相著二水開立真言曰

大日如來也

次金剛體身真言印

唵哈吽囉曰囉麼曳縛曰羅

大

次海三昧印真言

唵縛曰赦

釋迦牟尼佛

次常住火光三昧印真言曰

唵拔折羅赦悞

釋迦牟尼佛

若行者恒繫此俱力迦龍王念自然成護摩火光三昧四臂明王
皆此龍王用力常布行人身上阿字有其中劍遍含五字遍體
成無動尊金剛身如是觀已誦一字真言

那莫三曼多囉曰羅赦憾

次金迦羅印真言

釋迦
此也

印二手金剛合掌二中指二大指入掌中即成真言

唵金迦羅那囉曰羅

次誓陀迦印真言

二手內縛。二地二風開散小曲相成。

唵囉曰囉赦吽栖陀迦野娑婆賀

次蓮花吉祥印真言

觀音是
也部主

二羽合掌。二水二風內相叉。

曩莫三曼多縛曰羅赦吽吽憾曳陀羅野莎曷。此四使者加不動成五使者。大日如來五智成身此也。

俱力迦羅儀軌

俱力迦羅龍王儀軌

六

說矩里伽唐作尊勅龍王像法

說矩里迦

唐勅作

龍王像法

其形如蛇作雷電之勢。身金色繫如意寶。三昧焰起四足蹴踘之形。背張豎七金剛利針。額生一支玉角。纏繞劍上畫阿字。兼用觀心。一一分明。若作人相者。面目喜怒遍身甲冑。猶如毘嚩博叉王。左托腰把索。右臂屈肘向上執劍。頂上置龍王蟠立金剛山。別本云。迦里龍王如天神熙怡之相。頭上畫出七頭龍胡跪仰視如來。合捧寶蓮華。阿字變成此龍使者。此字是重菩提種子。凡持誦者。皆有此心。希求無上菩提故。劍上觀此字。從此生一切法也。即菩提心也。行點者成就福智故。大空者是成菩提也。涅槃點者是除遣義。諸垢入涅槃也。童子猶如大龍王有大威德。興雲致雨。一切。

自在故阿字亦復如是。如來作事皆從此字出生。

次龍王法身印真言 左右無名小指掌內相叉。二中指直豎相
拄。以二食指拄中指背上節。以二大指少曲各拄二食指內中節。
頭來去在肘樣如後真言曰 襲莫三漫多勃馱喃唵 一布祇 二

步醯布伽跋底吽莎訶

上音四

一切龍王法身印 以右羽頭在左內。以右後四指少曲。母指博
頭指少曲之。左手返曲向右手上亦如是。兩手相向狀如蛇口。以
二手四指開令來去。真言 如前 次華座印

二手八指似曲不曲皆向上豎。二小指相去二寸。二無二中各相
去二寸。二頭指去四寸。並豎大指二指相著

次牙印 屈右肘向上屈無名小指在掌中指直豎。屈頭指側著

中指節以大指捻頭指側若作壇供養時節作此印誦真言用前
喚入壇中即得一切皆悉歡喜若欲祈雨當具作壇供養即得降
雨三五七八九一寸等云云

次根本真言曰 云云法具在別文

曩莫三滿多勃馱嘯俱迦耶迦囉若銘伽扇爾
曳娑嚩合二訶

用前印若有病患者當結龍王身印加持即執劍上上運心觀
想婀字變成金色龍忿怒光曜之貌令觀病人即得除差若有蘖
嘌訶魅魎之著識嘌行疫病鬼之持位在南方及瘧病種種苦惱
事當作一肘水壇四角置瓶口插生華用綵華亦得四方置四器
盛滿香水諸供具物布列莊嚴即勸請龍王安住壇上壇中方置
劍啓白事由禮拜供養誦真言加持百八遍執刀加被病人即得

消滅即發遣誦破壇明

次觀風輪破壇了不獲令久住是法秘中秘也莫專輒傳俱哩迦
龍者諸龍之中王具出文殊師利法等

矩里迦龍王像法

佛說俱利伽羅大龍勝外道伏陀羅尼經

佛說俱利伽羅大龍勝外道伏陀羅尼經

如是我聞。一時佛在王舍大城。爾時寶幢陀羅尼菩薩白佛言。俱利伽羅大龍。以何因緣吞飲利劍。及以四足被繞。佛告寶幢陀羅尼菩薩言。昔色究竟天魔醯首羅知勝城。無動明王與外道論。共致種種神變成智。時無動明王變成智火之劍。時有九十五種外道。其首人名智達。又成智火劍。時無動明王智火大劍變成俱利伽羅大龍。有四支降三世軍陀利琰魔都伽金剛夜叉等四大明王也。頸王有蓮名智火含字俱利伽羅。高十万由旬也。從口出氣如二万億雷。一時鳴。聞之外道魔王捨惡疑邪執。佛說陀羅尼曰。曩謨悉底合二悉底合二蘇悉底同下悉底伽羅羅耶俱琰參摩摩悉利。

合二 阿闍麼悉底婆婆呵

此呪威力除一切不詳降伏諸魔王。若有人靈氣惱書姓名。以此呪誦三七遍。靈鬼忽然之間得焚燒。斷五辛酒。宋不染婦女穢執。一心誦此呪。一切所求決定得圓滿。不時樹令開華。四海成山妙高山王成海。此呪威力此呪功德也。焚冰如油。凹心樹如水。一切皆隨心。猶如跋伽梵。故重說偈曰

奉仕修行者 猶如跋伽梵 得三摩地上 與菩薩同位
俱利伽羅龍 稱念彼名字 現除怖魔障 後生安樂國
佛說此經。一切惡魔王九十五種大龍王。大歡喜信受奉行。
俱利伽羅龍王陀羅尼經

十
善
業
道
經

十善業道經

大唐于闐三藏實叉難陀奉 制譯

如是我聞。一時佛在娑竭羅龍宮。與八大比丘衆三萬二千菩薩摩訶薩俱。爾時世尊告龍王言。一切衆生心想異故造業亦異。由是故有諸趣輪轉。龍王汝見此會及大海中形色種類各別不耶。如是一切靡不由心造善不善。身業語業意業所致而心無色不可見取。但是虛妄諸法集起畢竟無主無我我所。雖各隨業所現不同而實於中無有作者。故一切法皆不思議自性如幻智者知已應修善業。以是所生蘊處界等皆悉端正見者無厭。龍王汝觀佛身從百千億福德所生諸相莊嚴光明顯曜蔽諸大眾設無量億自在梵王悉不復現其有瞻仰如來身者莫不目眩。汝又觀

此諸大菩薩妙色嚴淨。一切皆由修集善業福德而生。又諸天龍八部衆等大威勢者。亦因善業福德所生。今大海中所有衆生。形色麁鄙或大或小。皆由自心種種想念。作身語意諸不善業。是故墮業各自受報。汝今當應如是修學。亦令衆生了達因果修習善業。汝當於此正見不動。勿復墮在斷常見中。於諸福田歡喜敬養。是故汝等亦得人天尊敬供養。龍王當知菩薩有一法能斷一切諸惡道苦。何等爲一。謂於晝夜常念思惟觀察善法。令諸善法念念增長。不容毫分不善間雜。是即能令諸惡永斷善法圓滿。常得親近諸佛菩薩及餘聖衆。言善法者。謂人天身聲聞菩提獨覺菩提無上菩提。皆依此法以爲根本而得成就。故名善法。此法即是十善業道。何等爲十。謂能永離殺生偷盜邪行妄語兩舌惡口綺。

語貪欲瞋恚邪見。龍王若離殺生即得成就十離惱法。何等爲十。一於諸衆生普施無畏。二常於衆生起大慈心。三永斷一切瞋恚習氣。四身常無病。五壽命長遠。六恒爲非人之所守護。七常無惡夢寢覺快樂。八滅除怨結衆怨自解。九無惡道怖。十命終生天是爲十。若能迴向阿耨多羅三藐三菩提者。後成佛時得佛隨心自在壽命。復次龍王。若離偷盜。即得十種可保信法。何等爲十一者。資財盈積。王賊水火及非愛子不能散滅。二多人愛念。三人不欺負。四十方讚美。五不憂損害。六善名流布。七處衆無畏。八財命色力安樂。辯才具足無缺。九常懷施意。十命終生天是爲十。若能迴向阿耨多羅三藐三菩提者。後成佛時得證清淨大菩提智。復次龍王。若離邪行。即得四種智所讚法。何等爲四。一諸根調順。二永

離誼掉三世所稱歎四妻莫能侵是爲四若能廻向阿耨多羅三藐三菩提者後成佛時得佛丈夫隱密藏相復次龍王若離妄語即得八種天所讚法何等爲八一曰常清淨優鉢華香二爲諸世間之所信伏三發言成證人天敬愛四常以愛語安慰衆生五得勝意樂三業清淨六言無誤失心常歡喜七發言尊重人天奉行八智慧殊勝無能制伏是爲八若能廻向阿耨多羅三藐三菩提者後成佛時即得如來真實語復次龍王若離兩舌即得五種不可壞法何等爲五一得不壞身無能害故二得不壞眷屬無能破故三得不壞信順本業故四得不壞法行所修堅固故五得不壞善知識不誑惑故是爲五若能廻向阿耨多羅三藐三菩提者後成佛時得正眷屬諸魔外道不能沮壞復次龍王若離惡口即得

成就八種淨業.何等爲八.一言不乖度.二言皆利益.三言必契理.
四言詞美妙.五言可承領.六言則信用.七言無可譏.八言盡愛樂.
是爲八.若能廻向阿耨多羅三藐三菩提者.後成佛時具足如來
梵音聲相復次龍王.若離綺語.即得成就三種決定.何等爲三.一
定爲智人所愛.二定能以智如實答問.三定於人天威德最勝無
有虛妄.是爲三.若能廻向阿耨多羅三藐三菩提者.後成佛時即
得如來諸所授記.皆不唐捐.復次龍王.若離貪欲.即得成就五種
自在.何等爲五.一三業自在.諸根具足故.二財物自在.一切怨賊
不能奪故.三福德自在.隨心所欲物皆備故.四王位自在.珍奇妙
物皆奉獻故.五所獲之物過本所求百倍殊勝.由於昔時不慳嫉
故.是爲五.若能廻向阿耨多羅三藐三菩提者.後成佛時三界特

尊皆恭敬養復次龍王若離瞋恚即得八種喜悅心法何等爲八一無損惱心二無瞋恚心三無諍訟心四柔和質直心五得聖者慈心六常作利益安衆生心七身相端嚴衆共尊敬八以和忍故速生梵世是爲八若能廻向阿耨多羅三藐三菩提者後成佛時得無礙心觀者無厭復次龍王若離邪見即得成就十功德法何等爲十一得真善意樂真善等侶二深信因果寧殞身命終不作惡三惟歸依佛非餘天等四直心正見永離一切吉凶疑網五常生人天不更惡道六無量福慧轉轉增勝七永離邪道行於聖道八不起身見捨諸惡業九住無礙見十不墮諸難是爲十若能廻向阿耨多羅三藐三菩提者後成佛時速證一切佛法成就自在神通爾時世尊復告龍王言若有菩薩依此善業於修道時能離

殺害而行施故常富財寶無能侵奪長壽無夭不爲一切怨賊損害離不與取而行施故常富財寶無能侵奪最勝無比悉能備集諸佛法藏離非梵行而行施故常富財寶無能侵奪其家直順母及妻子無有能以欲心視者離虛誑語而行施故常富財寶無能侵奪衆毀謗攝持正法如其誓願所作必果離離間語而行施故常富財寶無能侵奪眷屬和睦同一志樂恒無乖諍離麤惡語而行施故常富財寶無能侵奪一切衆會歡喜歸依言皆信受無違拒者離無義語而行施故常富財寶無能侵奪言不虛設人皆敬受能善方便斷諸疑惑離貪求心而行施故常富財寶無能侵奪一切所有悉以慧捨信解堅固具大威力離忿怒心而行施故常富財寶無能侵奪速自成就無礙心智諸根嚴好見皆敬愛離

邪倒心而行施故常富財寶無能侵奪恒生正見敬信之家見佛聞法供養衆僧常不忘失大菩提心是爲大士修菩薩道時行十善業以施莊嚴所獲大利如是龍王舉要言之行十善道以戒莊嚴故能生一切佛法義利滿足大願忍辱莊嚴故得佛圓音具衆相好精進莊嚴故能破魔怨入佛法藏定莊嚴故能生念慧慙愧輕安慧莊嚴故能斷一切分別妄見慈莊嚴故於諸衆生不起惱害悲莊嚴故愍諸衆生常不厭捨喜莊嚴故見修善者心無嫌嫉捨莊嚴故於順違境無愛恚心四攝莊嚴故常勤攝化一切衆生念處莊嚴故善能修習四念處觀正勤莊嚴故悉能斷除一切不善法成一切善法神足莊嚴故恒令身心輕安快樂五根莊嚴故深信堅固精勤匪懈常無迷忘寂然調順斷諸煩惱力莊嚴故衆

怨盡滅無能壞者。覺支莊嚴故。常善覺悟。一切諸法。正道莊嚴故。得正智慧。常現在前。正莊嚴故。悉能滌除一切結使。觀莊嚴故。能如實知諸法自性。方便莊嚴故。速得成滿爲無爲樂。龍王當知此十善業。乃至能令十力無畏十八不共。一切佛法皆得圓滿。是故汝等應勤修學。龍王譬如一切城邑聚落。皆依大地而得安住。一切藥草卉木叢林。亦皆依地而得生長。此十善道亦復如是。一切人天依之而立。一切聲聞獨覺菩提諸菩薩行。一切佛法咸共依此十善大地而得成就。佛說此經已。娑竭羅龍王及諸大衆。一切世間天人阿修羅等。皆大歡喜信受奉行。

十善業道經

大方等大集經卷第四十四
日藏分中三歸濟龍品第十二

大方等大集經卷第四十四

隋天竺三藏那連提耶舍譯

日藏分中三歸濟龍品第十二

爾時空中自然而雨種種香華種種寶衣種種音樂種種歌舞充滿虛空。一切天龍夜叉羅刹及阿修羅悉皆恭敬。爾時世尊與諸大衆菩薩聲聞左右圍繞前後隨從。從須彌頂蹈龍身橋下法羅底聖人住處梵天所敷寶師子座坐於彼座。時虛空中一切天龍夜叉羅刹并阿修羅緊那羅等各設供養種種香末種種華香種種寶衣以散佛上右繞三匝禮已而坐。爾時娑伽羅龍王白佛言。世尊何因緣故我等一切在龍中生。佛言龍王諦聽諦聽我今爲

王分別廣說。有十種業來生龍中。何者爲十。有諸衆生行六波羅蜜。欲得阿耨多羅三藐三菩提覺。亦願欲得無惡障礙。或復欲得多修布施。以時捨施。願因緣故來生龍中。復次龍王。或有衆生於大乘中修行捨施。福德果報因緣故願生龍中。復次龍王。或有衆生爲阿耨多羅三藐三菩提故行於布施。福報雖多不能清淨怖畏地獄餓鬼畜生中。因緣故願生龍中。復次龍王。有諸衆生欲行阿耨多羅三藐三菩提時。生高心大慢力。因緣故願生龍中。復次龍王。有諸衆生發菩提願。行阿耨多羅三藐三菩提時。多生瞋恚恨他衆生。以瞋忿向彼地獄餓鬼畜生因緣故長起瞋忿。如是死已願生龍中。復次龍王。有諸衆生求於小乘。欲得福田覓聖人中。捨布施報福德供養。如是因緣自願力故來生龍中。復次龍王。有

諸衆生嫉妬慢故彼業因緣來生龍中復次龍王有諸衆生多起
憍慢饒於語言以彼自業來生龍中復次龍王有諸衆生不信佛
法僧寶又不供給和上阿闍梨及餘大德又不供養父母二親於
中種種瞋忿毒心愛憎憍慢癡因緣故於福田中邪錯行故以是
業緣來生龍中復次龍王有諸衆生種種癡慢惡業力多福德力
少心怖畏故願生龍中復次龍王有諸衆生妄語兩舌惡口無慈
此三業緣故而生龍中佛言龍王以此十種業因緣故來龍中生
復次龍王復有三業因緣而生龍中何等爲三有諸衆生堅固惡
業造身口意彼業熟故生地獄中經無量劫受大極苦難得解脫
雖免大業小業未盡生於龍中或畜生中或餓鬼中以此三惡業
因緣故來生龍中時娑伽羅龍復白佛言如是世尊而此龍中或

有諸龍所受樂報猶如諸天或有餘龍受樂如人有如餓鬼如畜生者或有餘龍如地獄中受大辛苦說是事已時娑伽羅大龍王子名青蓮華面前白佛言世尊我何惡業罪因緣故來生龍中身大端正所有色觸或復衣裳及坐臥處於一切時我身受用猶如火燒常無衣服赤體而行如我父王樂受最勝如轉輪王果報不異佛言華面諦聽諦聽善思念之今當爲汝說於本事乃往過去三十一劫有佛世尊名曰尸棄多陀阿伽度阿羅訶三藐三佛陀時彼世中有王名曰裴多富沙彼富沙王於三月中供養彼佛并及無量百千須陀洹斯陀含阿那含阿羅漢并大菩薩摩訶薩衆以種種衣服飲食湯藥而供給之至心聽法既聞法已即發阿耨多羅三藐三菩提心如是三月設供養已彼富沙王爲尸棄佛及

餘衆僧造立寺舍施種種衣飲食湯藥牀臥被褥具足豐饒彼富沙王第一太子名裴多婆樹帝彼婆樹帝見佛聞法於流轉中生大怖畏從父王邊禮拜諮詢請欲就佛願求出家王報子言欲往隨意任汝出家既出家已又白父言我欲父王寺上停止富沙王言亦隨汝意住彼寺中時尸棄佛衆僧弟子在彼寺中坐臥受用敷噉飲食彼富沙子裴多樹帝妬嫉心生忿彼舊住佛弟子衆恒瞋罵之時彼衆僧被瞋罵已悉皆離寺彼婆樹帝見僧去已生歡喜心即自念言彼去者好我大安隱衆僧去已時婆樹帝恣用寺內衣服飲食有餘人來即不聽住彼婆樹帝具造如是諸惡業已命終之後生大地獄中經無量千萬那由他歲受諸火燒地獄得脫生餓鬼中復經無量百千萬歲而受辛苦餓鬼中死還墮地獄

脫地獄已生餓鬼中。如是經由三十一劫。汝等諸龍諦聽諦受。其婆樹帝於流轉中。具足如是受諸辛苦。佛言華面。彼婆樹帝者。豈異人乎。即汝身是也。乃往過去惡業因緣故。生大地獄餓鬼畜生。輪轉受苦。經是三十一大劫中。備受衆苦。未曾暫捨。餘殘業故來生龍中受是惡報。時華面龍聞是語。已大聲啼哭。舉身自投四支布地。禮拜白佛作如是言。我今至心從佛懺悔。我大癡惑大慢愚矇。不解方便差別。好惡造是罪業。低頭合掌。至心發露。不敢覆藏。如來世尊。我今至誠入於骨髓。歸佛歸法歸比丘僧。從今發意乃至壽盡。於是時中作優婆塞。佛言善哉善哉。善男子。汝今有於地獄餓鬼惡道業報。如是至心歸依我者。得盡彼業。此中死已值彌勒佛。得於人身。於彌勒佛法中出家證羅漢果。佛言華面。莫更狐

疑時彼裴多富沙人王於三月中以種種資生供養尸棄如來及諸菩薩聲聞衆故今得此報受婆伽羅大龍王身猶如天樂三十劫不生三惡常生天人受如是報彼亦爲於阿耨多羅三藐三菩提行因緣故來此龍中願欲得生說是語時一切諸龍皆大懊惱悔往先咎悉於佛前至心供養爾時衆中有一盲龍名曰頗羅機梨奢舉聲大哭作如是言大聖世尊願救濟我願救濟我諸佛慈悲憐愍一切我今身中受大苦惱日夜常爲種種諸蟲小蛇蝦蟆之所唼食居熱水中無暫時樂佛言梨奢汝過去世於佛法中曾爲比丘毀破禁戒內懷欺詐外現種種善相威儀廣貪眷屬弟子衆多名聲四遠莫不聞知彼諸弟子如是說言我和上得阿羅漢果以是因緣多得供養得供養已獨受用之見持戒人反惡加

說。彼人懊惱如是念言。世世生中願我所在食汝身肉。如是惡業死生龍中。是汝前身衆生願故食噉汝身。惡業因緣得此報住熱水中。又於過去無量劫中。在融赤銅地獄之中。常爲諸蟲之所食噉。爾時龍衆聞此語已。憂愁啼哭作如是言。我等今者皆悉至心咸共懺悔。願令此苦速得解脫。爾時如來出金色手摩彼龍面作如是言。汝等諦聽。我於過去曾作國王名曰善眼。是時有一盲婆羅門來從我乞求索一眼。我時歡喜兩眼皆與。若我此言誠不虛者。令汝梨奢清淨眼生。一切諸罪悉皆除盡。即說呪曰。

多經噉 砥芻佞性婆 婆蘭那佞性婆 覺磨佞性婆 阿難闍那
毗囉闍佧行破 蘭多若摩 尼婆羅那都夜 阿鞞栴陀羅
樹低 頻頭輸第 吃利波輸第 頗羅輪第 阿誓 多誓

多隸

多隸

婆細陀索繼陀索繼鳴盧羅避

摩訶鳴盧羅避

帝腹阿邏多那婆羅帝莎呵

爾時世尊說此實淨眼陀羅尼已。彼梨奢龍得清淨眼。餘五萬三千龍亦得淨眼。及餘八十四那由他夜叉鳩槃茶餓鬼薜荔多毗舍遮人非人等。罪垢消滅皆得淨眼。爾時善德天子向佛合掌。而說偈言

看彼十力世導師 能使諸龍眼清淨
今生若不得值佛 諸失眼者常盲冥

爾時世尊告長老憍陳如。汝可持此淨眼陀羅尼呪。若有衆生過去惡業。於今現在或當來世。或四大病。或惡人呪。或因毒藥。以此緣故。即便失目。如是衆生。應當誦此淨眼陀羅尼。自悔過去所造。

惡業。於諸衆生起大慈悲。至心念佛捨於餘事。七七日中晝夜六時以手拭眼。以是因緣得清淨眼。若有衆生於過去世作諸惡業。或毀於法。或謗聖人。於說法者爲作障礙。或抄寫經洗脫文字。或損壞他眼。或暗蔽他。此業緣故今得盲報。如是重惡業因緣故。七七日中不得差者。應當抄寫此陀羅尼。至心誦持悔過彼業。復以海沫甘草。呵梨勒阿摩羅。毗醯羅。此五種藥擣末蜜和。盛著舊龜甲中。以久年蘇火上煎已。誦此陀羅尼一千八遍。以呪此藥用塗眼上。捨諸緣事。七七日中念佛造像。至心發願。時彼衆生惡業消盡得清淨眼。若有財者并營寺舍。隨力所辦布施資生。如是一切惡業皆盡。於當來世無量生中常不失眼。爾時一切諸龍衆等作如是言。南無南無大悲世尊。能施三世衆生利益。失眼得明。一切

惡業清淨無垢爾時有龍名曰青色大聲唱喚而說偈言

世尊能除諸罪垢 猶如大河洗一切 悉知衆生種種行
是故稱佛衆中尊 我所居停住澤中 大野枯泉無有水
熱風吹身劇於火 形體屋舍臭難堪 八千億年住於彼
曾無一日受歡樂 常爲衆生所食噉 眷屬大小悉皆然
爾時世尊說偈答言

若有衆生造諸罪 而復修營於福德
種種飲食供養僧 以此雜福因緣故
造惡苦辛如地獄 施食快樂似天堂
緣彼善業因緣故 於龍頭中自然出
所欲念者皆隨意 種種果報皆悉具
建立寺舍施鍾鈴 在所生中隨業受
在所生中隨業受 或復來生於龍中
希有如意妙寶王 雖處枯泉及旱澤

能出上妙清流水 清淨虛空布密雲 地平如掌泉池湧
行住坐臥所在處 皆能應念生諸水 若有一切諸衆生
雖復能得於人身 備造種種罪惡業 不能供養於三寶
死後衆苦皆聚集 地獄餓鬼具受之 設復得爲龍王身
所有眷屬并妻子 貧窮饑餓諸熱惱 頂上無有如意寶
居住空澤多毒蟲 枯涸常乾無有水 如是皆由過去世
曾於佛法作比丘 或見蘭若苦行人 嫉妬慳惜飲食
遠客比丘來寄止 瞪忿懷怒心不喜 檀越平等施飲食
於中遮止便罵詈 設有清淨好流水 屎尿糞穢滿其中
所有居住行坐處 一切臭穢皆不淨 或有清淨持戒者
如是見已皆遠離 無心欲來於此者

彼人惡業因緣故
無量億年受楚毒
餘報復生龍道中
在所生處空無水
死已數入地獄中
如是循還餓鬼中
持戒智慧學多聞
此業因緣須斷除
爾時如來說是偈已
悉雨淚作如是言。唯願哀愍救濟於我。大悲世尊。我等憶念過去
世時。於佛法中雖得出家。備造如是種種惡業。以惡業故。經無量
死墮地獄無量世
如是餓鬼中饑渴
具足多年受辛苦
或在枯澤惡焦山
大火熱惱充遍身
自非修禪能救濟
禮拜供養佛如來
妬嫉毒心最爲惡
憶念死時受是殃
決定無疑早懺悔

身在三惡道亦以餘報故生在龍中受極大苦如青色龍我亦如是爾時世尊語諸龍言汝可持水洗如來足令汝殃罪漸得除滅時一切龍以手掬水水皆成火變作大石滿於手中生大猛炎棄已復生如是至七一切龍衆見如是已驚怖懊惱啼泣雨淚佛告諸龍汝造罪業得是惡報修善業人受於好果我今教汝說真實誓若佛導師憐愍一切於諸衆生平等無二此言不虛願我諸龍火炎時滅作是誓已火炎皆滅時餓龍等乃至八過以手捧水洗如來足至心懺悔我從今日更不造惡如是懺已各白佛言如來大慈願救濟我佛言諸龍汝此惡業有餘未盡彌勒佛世當得人身值佛出家精進持戒得羅漢果時諸龍等得宿命心自念過業啼泣雨面各如是言我憶往昔於佛法中或爲俗人親屬因緣或

復聽法來去因緣。所有信心捨施種種華果飲食。共諸比丘依次而食。或有說云。我曾喫噉四方衆僧華果飲食。或有說言。我往寺舍布施衆僧。或復禮拜如是喫噉。或復說言。我毗婆尸如來法中曾作俗人。或復有說。我尸棄佛如來法中曾作俗人。或復有說。我毗葉婆如來法中曾作俗人。或復有說。我迦羅拘村駄佛法之中曾作俗人。或復有說。我迦那迦牟尼佛法之中曾作俗人。或復有說。我迦葉佛如來法中曾作俗人。或復有說。我釋迦牟尼佛法之中曾作俗人。或以親舊問訊因緣。或復來去聽法因緣。往還寺舍。有信心人供養僧故。捨施華果種種飲食。比丘得已迴施於我。我得便食。彼業因緣於地獄中經無量劫。大猛火中或燒或煮或飲洋銅。或吞鐵丸。從地獄出墮畜生中。捨畜生身生餓鬼中。如是種

種備受辛苦。惡業未盡生此龍中常受苦惱。熱水爛身熱風吹體。熱沙熱土熱糞熱灰。食入口中變成銅汁或作鐵丸。於一切時所食之物入口口焦入咽爛入腹腹然直過墮地遍體穿穴。受如是苦不可堪忍。惟願如來慈悲救濟。佛告諸龍。此之惡業與盜佛物等無差別。比丘逆業其罪如半。然此罪報受未盡故難可得脫。汝等今當盡受三歸一心修善。以此緣故於賢劫中值最後佛名曰樓至。於彼佛世罪得除滅。時諸龍等聞是語已。皆悉至心盡其形壽各受三歸。時彼衆中有盲龍女。口中縫爛滿諸雜蟲狀如屎尿乃至穢惡猶若婦人。根中不淨臊臭難看。種種噬食膿血流出。一切身分常爲蚊蠅諸惡毒蠅之所唼食。身體臭處難可見聞。爾時世尊以大悲心見彼龍婦眼盲困苦。如是問言。妹何緣故得此。

惡身於過去世曾爲何業。龍婦答言。世尊。我今此身衆苦逼迫無暫時停設。復欲言而不能說。我念過去三十六億於百千年生惡龍中受如是苦。乃至日夜剎那不停爲我往昔九十一劫於毗婆尸佛法之中作比丘尼。思念欲事過於醉人。雖復出家不能如法於伽藍內敷施牀褥。數數犯於非梵行事。以快欲心生大樂受。或貪求他物多受信施。以如是故於九十一劫常不得受天人之身。恒三惡道受諸燒煮。佛又問言。若如是者。此中劫盡妹何處生。龍婦答言。我以過去業力因緣生餘世界。彼處劫盡惡業風吹還來生。此時彼龍婦說此語已。作如是言。大悲世尊願救濟我願救濟我爾。時世尊以手掬水告龍女言。此水名爲瞋陀留脂藥和。我今誠實發言語汝。我於往昔爲救鴿故棄捨身命。終不疑念起慳惜。

心此言若實令汝惡患悉皆除差時佛世尊以口含水灑彼盲龍婦女之身一切惡患臭處皆差既得差已作是說言我今於佛乞受三歸是時世尊即爲龍女授三歸依時彼衆中復有一龍種種臭惡一切諸蟲滿其口中及咽喉內膿血流出有見聞者皆悉捨去時佛見已即便問言善男子汝於過去作何惡業受如是報彼龍張口於其口內出種種蟲膿血流溢猶如熱火雖復張口竟不能言即還閉口爾時世尊即爲彼龍而說偈言

汝以過去盜因緣 輕戲聖人受是報

至誠聽我此實言 即得清涼滅諸苦

爾時世尊說實語已即以少水瀉龍口中火及蟲膿悉皆滅盡龍口清涼作如是言大聖如來我憶過去迦葉佛時曾作俗人在田

犁地。有一比丘來從我乞求五十錢。我時報言。聽待穀熟當與汝食。比丘復言。若當五十不可得者願乞十文。我於爾時瞋彼比丘而語之言。乃至十錢亦不相與。時彼比丘心生懊惱。又於餘時往寺舍中入樹林下。輒便盜取現在僧物十菴羅果而私食之。彼業因緣地獄受苦。惡業未盡生野澤中作餓龍身。常爲種種諸蟲食噉。膿血流溢饑渴苦惱。又彼比丘以瞋忿心惡業緣故死便即作小毒龍身。生我腋下啖於我血。熱氣觸身不可堪忍。是故我身熱膿血滿。龍白佛言。大悲世尊唯願慈悲救濟於我。令我脫彼怨家毒龍。爾時世尊以手抄水發誠實語作如是言。我曾往昔於饑饉世爾時願作大身衆生長廣無量。以神通力於虛空中唱如是言。彼野澤中有大身蟲名曰不瞋汝等可往取其身肉以爲飲食可。

得不饑時彼世中人非人等聞此聲已一切悉往競取食之說是真實諦信語時彼龍腋下小龍即出時此二龍俱白佛言世尊我等久近離此龍身解脫殃罪佛告龍言此業大重次五無間何以故若有四方常住僧物或現前僧物篤信檀越重心施物或華或果或樹或園飲食資生牀褥敷具疾病湯藥一切所須私自費用或持出外乞與知識親里白衣此罪重於阿鼻地獄所受果報是故汝等可受三歸歸三寶已乃可得住於冷水中如是三稱三受身即安隱得入水中爾時世尊即爲諸龍而說偈言

寧以利刀自割身 支節身分肌膚肉 所有信心捨施物
俗人食者實爲難 寧吞大赤熱鐵丸 而使口中光焰出
所有衆僧飲食具 不應於外私自用 寧以大火若須彌

以手捉持而自食
其有在家諸俗人
不應輒食施僧食

寧以利刀自屠膾
身體皮膜而自噉
其有在家諸俗人

不應受取僧雜食
寧以自身投於彼
滿室大火猛焰中

其有在家俗人輩
不應坐臥僧牀席
寧以火熱炎鐵錐

拳手握持便焦爛
其有在家俗人等
不應私用於僧物

寧以勝利好刀枯
而自彎切其身肉
勿於出家清淨人

發起一念瞋恚心
寧以自手挑兩眼
捐棄投之擲於地

其有習行善法者
不應懷忿瞋心視
寧以熱鐵鎔其身

東西起動行坐臥
不應瞋忿心妬嫉
而著衆僧淨施衣

寧飲灰汁鹹鹵水
熱沸爍口猶如火
不應懷貪毒惡心

服食衆僧淨施藥

爾時世尊說此偈已。一萬四千諸龍衆等悉受三歸。所有過去現在業報諸苦惱中而得解脫。深信三寶其心不退。復有八十億諸龍衆等亦於三寶起歸敬心。爾時世尊告憍陳如汝觀此等諸惡衆生自誑其心。或以怖畏貧窮因緣。或於惡道生於恐畏修行善法。或作比丘所得種種資生之具。皆是信心檀越所施。而是衆生或自食噉。或與他人或共衆人盜竊隱藏私處自用。如是業故墮三惡道久受勤苦。復有衆生貪窮下賤不得自在。是故出家望得富饒解脫安樂。既出家已懈怠嬾墮不讀誦經禪慧精勤捨而不習樂知僧事。復有比丘晝夜精勤樂修善法。讀誦經典坐禪習慧不捨須臾。以是因緣感諸四輩種種供養。時知事人得利養已。或自私食或復盜與親舊俗人。以是等緣久處惡道出已還入。如是

愚暝不見當來果報輕重我今戒勑沙門弟子念法住持不得自稱我是沙門真法行人猗衆僧故他信施物或餅或果或菜或華但是衆僧所食之物不得輒與一切俗人亦不得云此是我物別衆而食又亦不得以衆僧物貯積興生種種販賣云有利益招世譏嫌又亦不得出貴收賤與世爭利又亦不得爲於飲食及僧因緣使諸衆生墮三惡道應須勸引安善法中令比丘衆真信三寶攝諸衆生乃至父母令得安隱置三解脫

大集經卷第四十四

「佛說海龍王經彙編」後記

本經版本根據「佛教大藏經」，唯編者於編校中發現原文有若干問題，今或已更改，或仍存疑，皆於后列表中說明，以供受持讀誦者參考。

頁次	行次	內容
一〇二	九	「彼」無極鎧，疑通「披」、「被」。
一〇二	七	寂然「憺怕」，疑當作「澹泊」。
一〇二	五	「依」食室宇，疑當做「衣」。 群「萌」，藏經原作「萌」，今遍查無「萌」字，且觀第五頁、第二十四頁、第八十四頁等處，在藏經中皆作「萌」，故據以改之。
九九	七	同右
九九	五	「香音神」，藏經作「香首神」，今遍查無「香首神」，且同行下及其他處皆作「香音神」，故據以改之。
一二五	五	「聞所受決」疑多一「所」字。
一二五	七	「貪」窮，疑當作「貧」。

佛說海龍王經彙編

功德主名錄

委印文號：104040

一三、〇〇〇元：台中市大肚山之山神、土地公、樹神、眾神、眾無形眾生等菩薩們，以及一真之宿世冤親、現世業債，咸憑法力，悉得解脫。

以上計新台幣：一三、〇〇〇元，恭印一、〇〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有怨枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持

佛曆二五五九年／西元二〇一五年二月

恭印… 一〇〇〇本

流水號：12982
書號：CH370-11

輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛說海龍王經彙編

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(011) - 3339511 - 1198

傳真：(011) - 33391111
郵局劃撥帳號：○七六九四九七九

銀行名稱：台灣銀行城中分行（請於電匯或轉帳後告知本會用途）

銀行帳號：○四五〇〇四五九七五〇一一

本會經書免費結緣之請取方式如下：

(一) 親臨**本會三樓講堂**。（二）利用傳真：(02) 23965959

(三) 撥打電話：(02) 23951198 (分機) 11、12

(四) 網址：<http://www.budaedu.org/books/>。（五）**請勿採用**：本會法寶流通股。

為提高服務效率，請您嚴謹考量，慎選所需經書，儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎ 本會經書，歡迎翻印（請勿增刪），贈送流通，功德無量。

◎ 本會交通—

※ 捷運：善導寺站 5 號出口，至杭州南路右轉，過兩個紅綠燈。

※ 公車站牌：審計部站 → 212、299、232、205、276、605、257、262
台北商業技術學院 → 253、297、237 仁愛路 1 段 → 253、297 雖南商工 → 208
仁愛路、杭州南路（紹興街）口 → 630、270、263、245、621、651、37、261

行政院新聞局出版事業總局 著作序 第三八六九號

